

四庫全書

經部

欽定四庫全書

經部

禮記纂言卷一中

詳校官通政使<sub>臣</sub>夢吉

給事中<sub>臣</sub>溫常綬覆勘

總校官編修<sub>臣</sub>王燕緒

校對官中書<sub>臣</sub>潘奕雋

謄錄監生<sub>臣</sub>俞昌言

欽定四庫全書

禮記纂言卷一中

元 吳澄 撰

曲禮

男女不雜坐不同梳枷不同巾櫛不親授外言不入於  
梱內言不出於梱女子許嫁纓非有大故不入其門姑  
姊妹女子子已嫁而反兄弟弗與同席而坐弗與同器  
而食

梳羊支切枷與  
架同梱苦本切

鄭氏曰皆為重別防譁亂不雜坐謂男子在堂女子  
在房也梳可以架衣者外言內言男女之職也不出

入者不以相問也。相門限也。女子許嫁繫纓有從人之端也。大故宮中有災變若疾病乃後入也。女子有宮者亦謂由命士以上也。女子十年而不出嫁及成人可以出矣。猶不與男子共席而坐亦遠別也。孔氏曰不親授者男女有物不親授也。內則云其相授則以篚無篚則皆坐奠之而後取之外言內言謂男職在官政女職在織紉各有限域不得濫預。女子婦人通稱也。婦人質弱不敢自固必有繫屬故恒繫纓。纓有二時一是少時常佩香纓內則云男女未冠笄纓是也。二是許嫁時繫纓昏禮主人入覲說婦纓鄭註婦人十五許嫁笄而禮之因著纓是也。蓋以五采為之其制未聞又內則曰婦事舅姑紵纓以此而言知有二纓也大故謂喪病之屬女子已許嫁則有宮門列為成人惟有喪病等乃可入其門。女子子謂已之女凡男子女子皆是父所生之子男則單稱子女則於子之上加女子二字以別於男子故云女子子。

也兄弟弗與同席而坐者雖已嫁及成人猶宜別席不云姪及父惟云兄弟者姪父尊卑禮殊不嫌也弗與同器而食者熊氏以為不許傳同器未嫁亦然澄曰巾謂悅手之巾櫛謂理髮之櫛姑姊妹女子子此謂一家之內有父之姊妹有已之姊妹有子之姊妹若已嫁而反者其兄弟皆不與同席同器也

○男女非有行媒不相知名非受幣不交不親

鄭氏曰見媒往來傳昏姻之言乃相知姓名有禮乃相纏固孔氏曰昏禮有六禮二曰問名先須媒氏行傳昏姻之意後乃知名幣謂聘之玄纁束帛先須禮幣然後可交親也澄曰昏禮先有行言之媒女家許乃納采謂男家納禮聽女家采擇采擇而可乃問女名將以女之名歸而卜其吉與否自此男家既知女名女家亦知男名矣故曰相知名卜而吉乃報女家曰納吉納吉後納徵有幣而女家受之自此乃請期

親迎而成昏也交謂  
交接親謂親近也

故日月以告君齊戒以告鬼神爲酒食以召鄉黨僚友

以厚其別也

齊側皆切  
別彼列切

鄭氏曰周禮凡取判妻入子者媒氏書之以告君昏禮  
凡受女之禮皆於廟爲神席以告鬼神召鄉黨僚友  
會賓客也厚重慎也孔氏曰男女須辨故婦來則書  
取婦之年月日以告國君齊戒謂嫁女之家受六禮  
並在廟布席告先祖也明女是先祖之遺體不可專  
輒許人戴氏曰上以告之人君幽以告諸鬼神以  
質諸鄉黨親戚上下幽明咸與聞之禮  
莫重於有別知之者衆則其別厚矣

○取妻不取同姓故買妾不知其姓則卜之

娶取音

鄭氏曰妾賤或時非賤取之於賤者世無本繫  
孔氏曰熊氏云既不知其姓但卜吉則取之

○賀取妻者曰某子使某聞子有客使某羞

此言為彼取妻而致餽遺其辭命如此也某子之某  
致餽者之氏也使某之某為使者之名也聞子之子  
指取妻之人而言也鄭氏曰為不在賓客之中使人  
往者羞進也言進於客其禮蓋壺酒束脩若犬孔氏  
曰親朋友有昏已有事礙不得自往而遣人往昏禮  
不賀此云賀者聞彼昏而送筐篚將表厚意身實不  
在為賀故云賀而其辭則不稱賀曰使者辭也某子賀  
者名言彼使我來也聞子呼取妻者為子也某是使者  
名不賀故但云聞子有客使某將此酒食與子進於客  
也呂氏曰賀者以物遺人而有所慶也昏禮著代以為  
先祖後人子之所不得已故不用樂不賀也雖曰不  
賀然為酒食以召鄉黨僚友則問遺不可廢故其辭

舍曰昏禮而謂之有客則所以羞者佐其共具之費以待鄉黨僚友而已非賀也世之不知禮者以其問遺猶以慶賀名之故作記者因俗之名稱賀也陳氏曰賀其有客非賀昏也

○嫂叔不通問諸母不漱裳

漱悉虔切

方氏曰通問若問安問疾之類蓋生不相通問死不相為服皆所以推而遠之坊記言婦人疾問之不問其疾則男女非不通問也特不施于嫂叔鄭氏曰通問謂相稱謝也諸母庶母也漱澣也庶母賤可使漱衣不可使漱裳裳賤尊之者亦所以遠別孔氏曰諸母謂父之諸妾有子者

○寡婦之子非有見焉弗與爲友

兄賢通切

鄭氏曰避嫌也有見謂有奇才卓然衆人所知孔氏曰寡婦無夫若其子凡庸與其來往則於寡婦有嫌



也

○男女異長男子二十冠而字父前子名君前臣名女

子許嫁笄而字

長知兩切  
冠去聲

鄭氏曰男女各自為伯季也冠是成人矣敬其名父  
前君前對至尊無小大皆相名女子以許嫁為成人  
○名子者不以國不以日月不以隱疾不以山川

鄭氏曰此在常語之中為後難諱也春秋傳曰名終  
將諱之隱疾衣中之疾也謂若黑臀黑肱疾在外者  
雖不得言猶可指搃此則無時可辟孔氏曰不以國  
者不以本國為名它國即得為名衛侯晉晉侯周是  
也不以日月不以甲乙丙丁為名殷家以為名者殷  
質不諱故也魯僖公名申蔡莊公名甲午者周末亂

世不能如禮不以隱疾者不以體上幽隱之疾為名  
不以山川者魯獻公名具武公名敖范獻子聘魯問  
具敖之山魯人以鄉名對獻子云何不云具敖乎  
對曰先君獻武之所諱也此皆不能如禮者也

右記男女之禮凡八節

人生十年曰幼學二十曰弱冠三十曰壯有室四十曰  
強而仕五十曰艾服官政六十曰耆指使七十曰老而  
傳八十九十曰耄七年曰悼悼與耄雖有罪不加刑焉

百年曰期頤

冠去聲艾五蓋切耄渠夷切耄忙  
報切期舊如字今從朱子音暮

鄭氏曰名曰幼時始可學也內則曰十年出就外傳  
學書計有室有妻也妻稱室艾老也指使指事使人

也六十不與服戎不親學老而傳謂傳家事任子孫  
是為宗子之父耄昏忘也春秋傳曰老將知耄及之  
悼憐愛也愛幼而尊老故不加刑期猶要也頤養也  
不知衣服食味孝子要盡養道而已孔氏曰幼者自  
始生至十九檀弓云幼名三月為名稱幼十年出就  
外傳故以十年為節冠禮云棄爾幼志是十九以前  
為幼二十成人初加冠體猶未壯故曰弱至二十九  
通名弱三十血氣已定故曰壯三十九以前通曰壯  
壯久則強故四十曰強一則智慮強二則氣力強也  
四十九以前通曰強年至五十氣力已衰髮蒼白色  
如艾堪為大夫得專服事其官政者至也六十至老  
之境不得執事但指事使人也六十至老境而未全  
老七十其老已全故言老年已老則傳家事付子孫  
不復指使也人或八十而耄或九十而耄故並言悼  
未有識慮可憐愛年七歲而在九十後者以其同不  
加刑故退而次之悼可憐愛老可尊敬雖有罪而不

加刑辟周禮司刺有三赦一曰幼弱二曰老耄若律  
令未滿八歲八十以上非手殺人他皆不坐百年不  
復知衣服飲食寒暖氣味故人子用心要求親之意  
而盡養道也朱子曰期當音居疑反論語期可已矣  
與暮字同周匝之義也期謂百年已周期如上幼弱  
等字願如上學冠等字陸農師點人生十年曰幼作  
一句學作一句下放此呂氏曰此  
備舉自幼至老十年一變之節也

○大夫七十而致事若不得謝則必賜之几杖行役以  
婦人適四方乘安車自稱曰老夫於其國則稱名越國  
而問焉必告之以其制

鄭氏曰大夫七十致其所掌之事於君而告老謝猶  
聽也君必有命勞苦辭謝之其有德尚壯則不聽爾

几杖婦人安車所以養其身體也安車坐乘若小車也老夫老人稱也於其國雖君尊異之自稱猶若臣鄰國來問必問於老者以答之制法度孔氏曰七十曰老在家則傳家事於子孫在官致所掌職事還君退還由里也致是與人明朝廷有賢代已君不使退而自去者尊賢也君若許其罷職必辭謝云在朝日久劬勞歲積是許其致事也今不得聽是其有德尚壯猶堪掌事則必賜之几杖若本國巡行役事婦人能養人故許自隨適四方謂遠聘與國古者乘四馬之車立乘此臣既老故乘一馬小車坐乘也然此養老之具在國及出皆得用之言行役婦人四方安車互見也自稱為老夫者明君貪賢之故而臣老猶在其朝也於其國謂自與君言也越國猶它國也若它國來問已國君之政君雖已達其事猶宜問於老賢則稱國之舊制以對它國之問也

○童子不衣裘裳

衣去聲

鄭氏曰裘太溫消陰氣使不堪苦不衣裳便役孔氏曰童子非成人之名衣獨著也童子體熱不宜著裘又應給從著裳則不便故童子並緇布襦袴二十則可衣裘裳

幼子常視毋誑立必正方不傾聽長者與之提攜則兩手奉長者之手負劒辟咡詔之則掩口而對

誑九况切  
長知兩切

奉芳勇切辟匹亦切咡如至切

鄭氏曰視今之示字小未有所知常示以正物以正教之毋誑欺立必正方不傾聽習其自端正提攜謂牽將行奉長者之手習其扶持尊者負謂置之於背劒謂挾之於旁辟咡詔之謂傾頭與語口旁曰咡掩

口而對習其鄉尊者屏氣也孔氏曰小兒恒習效長者長者常示以正事不宜示以欺誑立宜正嚮一方不得傾頭屬聽左右非惟教之聽立至於行步亦宜教之謂免長大當扶持長者因牽行之時教之奉長者之手先使學者令習便也豈但在行在抱時亦須教之長者或若負劔免之時而與之語當傾頭不正向之令氣不觸免亦令見長者所為而復習之童子雖未能掩口而對長者亦教其為之習嚮尊者屏氣也黃氏曰長者與之提携則皆幼童能行之時非懷抱之幼也嬰兒可冥於脇下如帶劔者豈能教之對尊者禮乎負劔辟咻詔之疑非負扶幼童乃是長者之身或負劔者將詔告幼童不便於屈身俯臨而語之辟咻者偏就近耳而詔之也幼童必掩口而對避其口氣為童子之禮

○年長以倍則父事之十年以長則兄事之五年以長

則肩隨之

長知兩切  
下並同

鄭氏曰年長以倍謂年二十於四十者肩隨與之並行差退孔氏曰此謂鄉里之中非親非友但年長倍已則以父道事之即父黨隨行也十年以長謂二十於三十者半倍故兄事之差退而鴈行也五年以長謂二十於二十五者肩隨則齊於鴈行也以此肩隨而推之則云父兄事之者豈是溫清如親正言其行耳澄曰此謂道路長幼同行之節父事之者王制所謂父之齒隨行也謂正當尊者之背隨其後而行也兄事之者王制所謂兄之齒鴈行之行次也肩隨王制所謂朋友不相踰也謂兩肩相並而差退不踰越其肩也

羣居五人則長者必異席



鄭氏曰席以四人為節因宜有所尊孔氏曰羣朋友也謂朋友居處法也古者地數橫席席容四人四人則推長者居席端若有五人應一人別席因推長者一人異席也澄曰居謂坐也上文言行而第長之禮此言坐而第長之禮因是推之六人則第三人以下共下席其第一第二人居上席也七人則第二第三居上席之下半其第一則居上席之上半也

○從於先生不越路而與人言

從才用切  
下並同

鄭氏曰先生老人教學者尊不二也孔氏曰從謂從行時先生師也謂師為先生者言彼先已而生其德多厚也戴氏曰禮無二敬從先生而越路與人言則敬有所分矣

遭先生於道趨而進正立拱手先生與之言則對不與

之言則趨而退

拱俱勇切

鄭氏曰拱手謂有教使趨退謂其不欲與已並行孔氏曰遭逢也此明道路與師長相逢之法趨疾也見師而起敬故疾趨而進就之又不敢斥問先生所為故正立拱手而聽先生之教呂氏曰與言則對不與言則退應答進退不敢專也

○從長者而上丘陵則必鄉長者所視

上時掌切鄉去聲

孔氏曰長者東視則東視西視則西視鄭氏曰為遠視不察有所問

○謀於長者必操几杖以從之

從如字

孔氏曰操執持也几杖俱是養尊者之物故於謀議之時將就之呂氏曰坐有几以憑行有杖以策皆優

老之具操以從之敬之至也鄭氏曰從猶就也

# ○長者問不辭讓而對非禮也

鄭氏曰長者問當謝不敏若曾子之為呂氏曰問者皆以不能問能以寡問多則少者當問長者今長者

反問之少者不辭讓而對則敬不足

# ○凡為長者糞之禮必加帚於箕上以袂拘而退其塵

# 不及長者以箕自鄉而扱之

為云偽切帚之手切袂迷世切拘古侯切扱音吸

鄭氏曰加帚於箕得兩手奉箕恭也謂初執而往時也弟子職曰執箕膺攜厥中有帚以袂拘謂掃時也以袂擁帚之前掃而却行之扱讀曰吸謂收糞時也箕去棄物以鄉尊者則不恭孔氏曰袂衣袂也退遷

也當埽時却還以一手捉帚又舉一手衣袂以拘障於帚前且埽且還故云拘而退扱斂取也澄曰以帚埽地除去塵穢謂之糞

○奉席如橋衡

奉芳勇切  
橋居廟切

鄭氏曰橫奉之令左昂右低如有首尾然橋井上梯棹孔氏曰衡橫也席舒則有首尾卷則無首尾此謂卷席奉之所奉席頭令左昂右低如橋之橫左尊故昂右卑故垂也

請席何鄉請衽何趾

鄭氏曰順尊者所安也坐問鄉卧問趾因於陰陽孔氏曰既奉席來當隨尊者所欲眠坐也席坐席也鄉面也衽卧席也趾足也坐為陽故問面欲何所鄉面亦陽也卧是陰故問足欲何所指足亦陰也

席南鄉北鄉以西方爲上東鄉西鄉以南方爲上

鄭氏曰上謂席端也布席無常坐在陽則尚左坐在陰則尚右孔氏曰南鄉北鄉謂東西設席南坐是陽其左在西北坐是陰其右亦在西俱以西方爲上東鄉西鄉謂南北設席東坐是陽其左在南西坐是陰其右亦在南皆以南方爲上蓋坐在陽則貴左坐在陰則貴右也此據平常布席如此若禮席則不然

○將即席容無忤兩手摳衣去齊尺

忤才洛切摳苦侯切齊音咨

呂氏曰作者愧赧不安之貌鄭氏曰忤顏色變齊裳下緝也孔氏曰弟子講問初來就席顏色宜莊不得變動摳提挈也衣謂裳也將就席時以兩手當裳前提挈裳使起令裳下緝去地一尺恐衣長轉足躡履之

衣毋撥足毋蹶先生書策琴瑟在前坐而遷之戒勿越

撥丰末切蹶居  
衛切又求月切

鄭氏曰撥發揚貌蹶行遽貌在前謂當行之前戒勿越廣敬也孔氏曰策篇簡也坐跪越踰也弟子將行若遇師諸物或當已前則跪而遷移之戒慎勿得踰越也

虛坐盡後食坐盡前坐必安執爾顏長者不及毋僂言

僂盡津忍切  
僂藏鑒切

鄭氏曰盡後謙也盡前為汙席執猶守也僂猶暫也非類雜也孔氏曰凡坐各有法虛空也空坐謂非飲食坐也盡後而不敢近前王藻云徒坐不盡席足是也食坐謂飲食坐也古者地鋪席而俎豆皆陳於席

前之地若坐近後則濺汗席王藻云食則齊豆去席尺是也凡坐好自搖動故戒之令必安坐久坐好異故戒之宜如嚮者毋忤顏容長者猶先生互言爾及謂所及之事也長者正論甲事未及乙事少者不得輒以乙事暫然雜錯之朱子曰說文云僂僂互不齊也僂言僂長者之先而言也

# 正爾容聽必恭毋勦說毋雷同必則古昔稱先王

勦初交切

鄭氏曰聽先生之言既說又敬勦猶擊也謂取人之說以為已說雷之發聲物無不同時應者人之言當各由已不當然也孟子曰無是非之心非人也稱先王者言必有依據孔氏曰正謂矜莊也顏容通語爾方受先生之道當正已矜莊聽師長之說宜必恭敬語當稱師友而言毋得擊取人之說以為已語凡為人之法當自立已心斷其是非不得聞他人之語輒附而同之若聞而輒同則似萬物之生聞雷聲無不

同應者雖不雷同又不得專輒故必法於古昔之正而所言之事必稱先王也先王聖人爲天子者方氏曰旣曰古昔又曰先王何也古昔者先王之時先王者古昔之人

○侍坐於先生先生問焉終則對

鄭氏曰不敢錯亂尊者之言呂氏曰問未終而對不敬其問也

請業則起請益則起

鄭氏曰尊師重道也業謂篇卷也益謂受說不了欲師更明說之如子路問政請益

○父召無諾先生召無諾唯而起

唯云軌切

鄭氏曰應辭唯恭於諾孔氏曰父與先生呼召稱諾則似寬緩驕慢陳氏曰諾者應之緩唯者應之速內



則應唯敬對事父之禮也論語曾子曰唯事師之禮也

○侍坐於君子君子問更端則起而對

孔氏曰更端別事也謂嚮語已畢更問他事鄭氏曰離席對敬異事也君子必令復坐

○侍坐於君子不顧望而對非禮也

鄭氏曰禮尚謙不顧望若子路率爾而對孔氏曰謂多人侍若君子指問一人則一人立對若問多人則當先顧望坐中或有勝已者宜前而已不得率爾先對也方氏曰顧於後望於前示其不敢專也胡氏曰若漢文問上林尉尉左右視應氏曰顧望者從容詳審有察言觀色之意言不輕發非但謙異而已

○侍坐於君子若有告者曰少閒願有復也則左右屏

而待

閒音閑屏必領切

鄭氏曰復白也言欲須少空閒有所白也屏猶退也呂氏曰閒謂閒隙俟事之閒隙而言之聘禮賓曰俟閒亦此意也舊音曰閑閒則閑矣人俟閒而有役則屏以待不敢干其私也方氏曰閒即無事之時役者報于上之謂與周官言諸侯之復同義

○侍坐於君子君子欠伸換杖屨視日蚤莫侍坐者請

出矣

欠丘敝切換仕轉切蚤音早莫與暮同

鄭氏曰以君子有倦意也換猶持也孔氏曰志疲則欠體疲則伸君子執杖在坐脫屨在側倦則自換持之或瞻其庭影望日早晚禮畢者賤者請進不請退退由尊者今見尊者為上諸事皆是欲起之漸故侍

坐者得  
請出

○侍坐於長者屨不上於堂解屨不敢當階就屨跪而  
舉之屏於側鄉長者而屨跪而遷屨俯而納屨

上時掌  
切鄉去

聲

鄭氏曰屨賤空則不陳於尊者之側不敢當階為防  
後升者就屨謂獨退也就猶著也屏亦不當階鄉長  
者而屨謂長者送之也不得屏遷之而已俯俛也遷  
或為還孔氏曰長者在堂故屨脫於階下若長者在  
室則得著屨上堂不得入室解脫也解屨綦也初升  
時解屨置階側若獨暫退則先往階側跪舉取之屏  
退也屏退於側不當階也遷徙也若為長者所送則  
就階側跪取屨稍移近前既取因俯身嚮長者而納

足著之不跪者跪則足嚮後不便故俯也雖不並跪亦坐左納右坐右納左爾朱子曰長者送之恐非是但謂雖降階出戶猶嚮長者不敢背爾

○侍坐於所尊敬毋餘席

孔氏曰先生坐一席已坐一席必坐於近尊者之端勿得更有空餘之席所以然者欲得親近先生備擬先生顧問不可遠也呂氏曰所尊敬謂天下達尊有爵有德有齒者也無餘席欲近尊者以聽教也澄曰侍坐於所尊之人唯敬之故近之而無餘席也若有餘席非敬也呂氏以所尊敬三字相屬不若從舊所尊句斷爲是

見同等不起上客起食至起燭至起燭不見跋

見賢通切跋駢

末切

鄭氏曰同等不起不為私敬上客起敬尊者食至起為饌變燭至起異晝夜跋本也燭盡則去之嫌若燼多有厭倦孔氏曰見已之同等後來不為之起任其坐在下空處所以然者尊敬先生不敢曲為私敬也上客謂尊者之上客尊者見之則起侍者宜從之而起食與燭至起則尊者不起古者未有蠟燭惟呼火炬為燭跋本謂把處火炬盡則藏所殘本

○尊客之前不叱狗讓食不唾

唾湯卧切

鄭氏曰主人於尊客之前不敢倦叱狗嫌若諷去之唾嫌有穢惡

○侍食於長者主人親饋則拜而食主人不親饋則不

拜而食

饋羣愧却

孔氏曰此侍從尊長為客禮也饋謂進饌也已雖侍尊長而主人若自親饋於已已則拜謝之而後食也張子曰從長者而就人食若主人親饋及已則拜而食若不親饋則禮非為我不拜而食不敢當其禮也與雖貳不辭同義

○御同於長者雖貳不辭偶坐不辭

鄭氏曰御同謂侍食於長者饌具與之同也貳謂重殺膳也辭之為長者嫌偶坐盛饌不為已孔氏曰御謂侍也侍者雖獲殺膳重而已不須辭其多也所以然者此饌本為長者設若辭之則嫌當長者偶饌也或彼為客設饌而召已往嫌偶於客共食此饌本為已設故不辭之一云偶二也若性獨有已主人設

餽已當辭謝若與他人俱坐則已不假辭以主人意不必在已也黃氏曰主人有尊客召已嬾偶雖有盛餽已不敢辭懼妨尊客待尊者辭之可也

○侍飲於長者酒進則起拜受於尊所長者辭少者反

席而飲長者舉未釂少者不敢飲

少詩照切  
釂子妙切

鄭氏曰降席拜受敬也燕飲之禮嚮尊少者不敢先長者飲盡爵曰釂燕禮曰公卒爵而後飲也孔氏曰尊所謂陳尊之處貴賤不同諸侯燕禮設尊在東楹之西尊面有鼻嚮君若鄉飲酒及鄉大夫燕則設尊陳於房戶之間使賓主得夾尊近尊嚮長者故往於尊所嚮長者而拜長者辭止少者之起故少者復反還其席而飲賜也舉猶飲也須待長者盡爵後少者乃得飲也臨川王氏曰拜受於尊所此是初進酒時

一拜受爾不然則已煩矣

○長者賜少者賤者不敢辭

鄭氏曰不敢亢禮也孔氏曰少謂幼稚賤謂童僕之屬敵者亢而有辭少者賤者則不敢被尊長之賜宜即受也澄曰章內或稱先生或稱長者或稱君子又稱所尊天下有達尊三爵齒德是也先生蓋兼齒德君子蓋兼爵德長者言其齒而已所尊義同先生但先生則謂教學之師所尊則泛言齒德之人然皆互言爾非有優劣輕重也方氏曰先生以教稱之也所尊以道稱之也君子以德稱之也長者以年稱之也

右記長幼之禮凡二十四節

凡與客入者每門讓於客客至於寢門則主人請入爲



席然後出迎客客固辭主人肅客而入主人入門而右

## 客入門而左

鄭氏曰每門讓下賓也敵者迎于大門外聘禮云君迎賓於大門內為席為猶敷也雖君亦然固辭又讓先入肅進也進客謂道之右就其右左就其左孔氏曰言凡者通貴賤也每門者天子五門諸侯三門大夫二門客敵者主人出門外迎客主人避不先入自謙下敬於賓也此云凡與客入謂燕也故下文云至寢門謂燕在寢也若相朝饗食皆在廟寢門最內門也主人嚮已應正席今客至內門方請先入敷席者一則自謙示不敢逆設席以招賢二則重謹更宜視之禮有三辭初曰禮辭再曰固辭三曰終辭客已再辭故主人進道容公食大夫禮公揖入賓從是也方氏曰請起事也於主人之將有為則曰請辭止事也

於客之不敢當則曰辭陳氏曰主人於賓迎之無不拜每門每曲無不揖此言迎而不言拜則拜可知言每門讓而不言每曲揖則揖可知

主人就東階客就西階客若降等則就主人之階主人

固辭然後客復就西階

復音服

鄭氏曰降下也謂大夫於君士於大夫也不敢輒由其階卑統於尊不敢自專也復就西階復其正也孔氏曰降等卑下之客者不敢亢禮故就主人階繼屬於主人聘禮公迎賓賓不就主人階公食大夫禮公迎賓賓入門左此皆是降等不就主人階者奉已君之命不可苟下主人故從客禮也方氏曰與主共階則以卑從尊而於禮為殺與主異階則以此敵彼而於禮為亢客降等則殺故就主人之階

主人與客讓登主人先登客從之拾級聚足連步以上

上於東階則先右足上於西階則先左足

拾音涉上時掌切下同

鄭氏曰拾當作涉聲之誤也級等也涉等聚足謂前足躡一等後足從之併連步謂足相隨不相過重蹉跌也先右先左近於相鄉敬孔氏曰客主至其階又各讓不先升也讓必以三三竟而客不從故主人先登亦肅客之義主人前升至第二級客乃升中較一級故云從之拾級聚足者上階法也連步以上者上上堂也在級末在堂後足不相過故云連步涉而升堂故云以上呂氏曰拾更也射者拾發投壺者拾投哭踊者拾踊皆更為之也拾級者左右足更上也澄按呂氏讀拾為其劫反

○若非飲食之客則布席席間函丈主人跪正席客跪

撫席而辭客徹重席主人固辭客踐席乃坐主人不問

客不先舉

函胡南切  
重直龍切

鄭氏曰非飲食謂講問之客也函猶容也講問宜相對容丈足以指畫也雖來講問主人跪正席猶以客禮待之異於弟子客跪撫席者答主人之親正徹去也去重席謙也再辭曰固客踐席乃坐客安主人乃敢安也講問宜坐客不先舉者客自外來宜問其安否無恙及所為來故孔氏曰布席謂舒之令相對若飲食燕饗則賓位在室外牖前列筵南鄉布席不須相對講說之席不在牖前或在於室所布兩席中間相去使容一丈之地文王世子云侍坐於大司成遠近間三席席之制三尺三寸三分寸之一三席是一丈也撫謂以手按止之按止於席而辭不聽主人之正席也主人為客設多重席客謙而目徹主人固辭

者周辭止客之徹也尊卑有數而客必徹之者既來講說本以德義相接不以尊卑為用故雖尊猶自徹也踐猶履也主人止客徹席故客還履席將坐主人待客坐乃坐也文或為杖王肅以為古人講說用杖指畫故使容杖也

### 右記賓主之禮凡二節

凡進食之禮左殽右胾食居人之左羹居人之右膾炙處外醯醬處內葱涿處末酒漿處右以脯脩置者左胸

右末

殽戶交切胾側吏切食音嗣膾古外切炙張夜切醯呼奚切涿以至切漿子羊切脯音甫胸其居切

鄭氏曰皆便食也殽骨體也胾切肉也醯在醢醢在豆食飯屬也居人左右明其近也外內殽胾之外內

也膾炙皆在豆近醢醬者食之主添蒸葱也處醢醬之左言末者殊加也添在豆酒漿處羹之右言若酒若漿爾兩有之則左酒右漿此大夫士與賓客熟食之禮其禮食則宜放公食大夫禮云左胸右末亦便食也屈中曰胸孔氏曰孰肉帶骨而饔曰穀純肉切之曰馾骨是陽故在左肉是陰故在右飯燥為陽故左羹濕是陰故右此饌之設羹食最近人羹食之外乃有穀馾故膾炙醢醬知在穀馾之外內也醢字徐作醢則醢之與醬兩物各別依昏禮及公食大夫禮醬在右醢在左此醢醬處內亦當醬右醢左也按公食禮宰夫自東房授醢醬公設之鄭註云以醢和醬又周禮醢人共齊菹醢物則醢醬共為一物也今此記文若作醢字則是一物醢之與醢其義皆通未知孰是但鄭註葱添云處醢醬之左則醢醬一物為勝地道尊右則末在左葱添文醢醢醬之下故知在醢醬之左儀禮正饌惟有菹醢無葱添故鄭以葱添為

殊加也。卑客則或酒或漿。若尊客則有酒有漿以脯脩置者。設食竟所須也。脯訓始始作。即成脩訓治脩治之。乃成。鄭註。腊人云薄。折曰脯。搗而施薑桂曰服。脩左胸以中屈處置左也。右末以末邊際置右也。右手取末際擘食之。便脯脩處酒左。

客若降等執食興辭。主人興辭於客。然後客坐。主人延客祭。食祭所先進。殺之序。徧祭之三飯。主人延客食。截然後辯殺。主人未辯客不虛口。

飯扶晚切。辯音徧下同。

鄭氏曰。辭者辭主人之臨已食。若欲食於堂下。然延道也。祭祭先也。君子有事不忘本也。客不降等則先祭。主人所先進。先祭之所。後進後祭之。如其次也。殺之序。徧祭謂截炙膾也。以其本出於牲體也。公食大

夫禮魚腊醬不祭也延客先食載後食穀穀尊也  
凡食穀辯於肩食肩則飽也客不虛口俟主人也虛  
口謂醕也客自敵以上其醕不待主人飽主人不先  
飽也孔氏曰降下等也謂大夫為卿之客其品等卑  
下也執提也興起也客既卑故未食先執飯起以辭  
謝主人飯為食主故特執之客既興辭故主人亦起  
辭止之則客從辭而止乃復坐食也延客祭者君子  
得食則種種出少許置在豆間之地以報先代造食  
之人敵客則得自祭不須主人之延道也凡祭食之  
法隨主人所設前後次第而祭序次序也次序稱匝  
祭之也三飯謂三食也禮食三飧而告飽須勸乃更  
食三飯竟主人乃道客食載也按公食大夫禮三飧  
竟不云延客食載與此異食載竟後乃始辯穀辯匝  
也主人道客令食至飽故食穀得匝也特牲少牢云  
初食散次食脊次食骼後食肩辯於肩則飽也虛口  
謂食竟飲酒蕩口使清潔及安食也用漿曰漱以口



潔清為義用酒曰醕醕訓演言食畢以酒演養其氣  
客雖食穀已匝不得輒醕蓋主人常讓客不自先飽  
故客待主人辨乃醕此謂卑客敵以上其醕不待按  
公食禮雖設酒優賓不得用醕但以漿漱口此是私  
客故用酒  
以醕也

卒食客自前跪徹飯齊以授相者主人興辭於客然後

客坐

卒子恤切  
齊將兮切

鄭氏曰謙也自從也齊醬屬也相者主人贊饌者公  
食大夫禮賓卒食北面取梁與醬以降也興辭不聽  
親徹孔氏曰卒食食已也食坐南鄉候客食竟起從  
坐前北面當已坐而跪自徹已所食飯與齊以授相  
者飯齊食主故也答主人初所親饋也齊醬  
道通名爾此為是卑者侍食之禮敵者則否

○共食不飽共飯不澤手毋搏飯毋放飯毋流歠毋咤  
食毋齧骨毋反魚肉毋投與狗骨毋固獲毋揚飯飯黍  
毋以箸毋噉羹毋絮羹毋刺齒毋歠醢客絮羹主人辭  
不能亨客歠醢主人辭以饗濡肉齒決乾肉不齒決毋

噉炙

飯扶晚切下搏飯放飯揚飯飯黍並同搏徒端切歠川曰切咤陟嫁切齧五結切箸直慮切噉它答

切絮救慮切刺七亦切醢音海亨普彭切饗其雨切濡仁朱切乾音干噉初怪切

鄭氏曰不飽謙也謂共羹飯之大器也澤謂按莎不澤手為汙手不潔也禮飯以手搏飯謂欲致飽不謙放飯去手餘飯於器中人所穢也流歠大飲嫌欲疾也咤嫌薄之齧謂有聲響不敬反魚肉為已歷口投

骨為其賤飲食之物固獲為其不廉也欲專之曰固  
爭取曰獲還不嚼菜絮猶調也為詳於味刺齒弄口  
也口容止歡醢為其淡故亦嫌詳於味決猶斷也噉  
謂一舉盡嚙為其貪食甚也孔氏曰共食宜謙不輒  
厭飫為飽也與入共食手宜潔清不得臨時撻莎手  
乃食恐為人所穢也取飯作搏則易得多是欲爭飽  
非謙也手就器中取飯若粘著手不得拂放木器中  
當棄於篚無篚棄於會會謂盥蓋也流歡謂開口大  
歡汁入口如水流則欲多而速是傷廉也咤謂舌口  
中作聲齧骨一則有聲二則嫌主人食不足以骨致  
飽魚肉與人同器若已齧殘不得反還器中少牢禮  
尸所食之餘肉皆別置於所俎投致也為客之禮毋  
得食主肉後棄其骨與犬固獲謂與人共食不可專  
固獨得及爭取也飯熟當待冷若揚去熱氣則為貪  
快傷廉飯黍當用匕故少牢廩人溉匕註云匕所以  
匕黍稷也羹有菜當挾嚼若舍而歡吞之是欲速而

多又有聲不敬也絮謂就食器中調凡鹽梅是嫌主人食味惡也口容欲靜止不得刺弄之為不敬醢肉醬也醬宜臧客失禮而絮羹則主人謝之云家不能亨炙味不調適也客失禮而歡醢則主人亦謝之云作醢淡而無鹽故可歡也濡濕也濕軟不可用手擘故用齒斷乾肉脯屬堅韌不可齒斷故須用手擘火灼曰炙若食炙肉先當以齒嚼而反置俎上嚼者不細齧一舉而并食之也朱子曰放飯大飯也流歡長歡也澄曰此一節五飯字皆當作上聲讀飯謂食之也共飯猶云共食搏飯謂以手搏斂而食之放飯當如朱子說謂大口而食之放肆無節也與流歡為類流歡謂長吸而歡之如水之流也揚飯謂揚去熱氣而急欲食之啗食謂口內作聲而食之固獲二字一意謂固必而取得之也搏飯放飯流歡啗食固獲揚飯六句一類二字皆虛齧骨嚙羹絮羹歡醢噉炙五句一類二字上虛下實下一字指所食之物而言

○羹之有菜者用桮其無菜者不用桮

桮古切

鄭氏曰桮猶箸也孔氏曰有菜鉶羹是也以其有菜交橫非桮不可無菜者謂大羹湆也直歡之而已其有肉調者犬羹兔羹之屬或當用之也

○餼餘不祭父不祭子夫不祭妻

餼子閏切

鄭氏曰食人之餘曰餼餼而不祭唯此類也食尊者之餘則祭盛之孔氏曰祭謂祭先也凡食人之餘及日晚食朝饌之餘皆云餼凡食餘悉祭惟父得子餘夫得妻餘則不祭言其早故也非此二條悉祭父得有子餘者謂年老致仕傳家事於子孫子孫有賓客之事故父得餼其餘夫餼其妻餘者謂宗婦與族人婦燕飲有餘夫得食之

右記飲食之禮凡五節

凡以弓劒苞苴簞笥問人者操以受命如使之容

苴子餘切

簞音丹笥思嗣切操倉刀切使色吏切

鄭氏曰問猶遺也苞苴裹魚肉或以葦或以茅簞笥盛飯食者謂曰簞方曰笥如使之容謂使者孔氏曰凡謂凡此數事皆謂苞苴者以草包裹詩云白茅包之既夕禮云葦苞長三尺是也苴者以草藉器而貯物簞圓笥方俱是竹器亦以葦為之問人者謂因問有物遺之也或自有事問人或聞彼有事而問之悉有物以表其意使者操持此上之物以進受尊者之命如臣為君聘使受君命先習其威儀進退令如其至所使之國之時之儀容故云如使之容也

○水潦降不獻魚鼈

潦音老

鄭氏曰不饒多也孔氏曰天降水潦魚鼈難得廬植庚蔚等並以為然或云水潦降下魚鼈豐足不饒並

其多

獻鳥者佛其首畜鳥者則弗佛也

佛扶弗切畜許六切

鄭氏曰佛疾也蓋為小竹籠以冒之為其啄害人也畜養也畜則馴

獻車馬者執策綏獻甲者執冑獻杖者執末獻民虜者

操右袂獻粟者執右契獻米者操量鼓獻孰食者操醬

齊獻田宅者操書致

綏音雖冑直又切袂彌弊切契苦計切量音亮齊子兮切

鄭氏曰凡操執者謂手所舉以告者也設其大者舉其小者便也甲鎧也曹兜鍪也民虜軍所獲也操其右袂制之契券要也右為尊孔氏曰策是馬杖綏是上車之繩車馬不上於堂呈策綏則知有車馬也謂鎧為甲者言如龜鼈之有甲鎧大兜鍪小小者易舉獻杖執末者末謂拄地頭也不淨不可嚮人故執以自嚮右袂右邊袖也以左手操其右袂用右手以防其異心執操互言爾粟稻粱之屬契謂兩書一札同而別之米六米之等量是知斗斛之數鼓是量器名也隱義云東海樂浪人呼容十二斛者為鼓以量米故云量鼓獻米者執契以呈之米云量則粟亦量粟云契則米亦書米可即食為急故獻者執量粟可久儲為緩故獻者執契契比量為緩也孰食蔥蒜之屬醬齊為食之主執主來則食可知若見芥醬必知獻魚膾之屬也書致謂圖於版書而致之於尊者也以上諸物可動故不云致而因宅著上版圖書畫以致



之故言書又言致也然古者田宅悉為官所賦本不屬民今得此田宅獻者是或有重勲為君王所賜可為已有故得有獻呂氏曰獻車馬獻甲獻粟獻米獻食獻田宅此六者不可手執則執一物以表其獻古者以契為信居者執左契出者執右契左契者無所事以待有所事老氏所謂聖人執左契是也予人粟者執左契以待之取人粟者執右契以合之此獻粟者所以執右契以表之也醬齊者主人親設客親徹食之主也孰食之於醬齊各有所宜所謂不得其醬不食杖與民虜二者可執而獻之故不以物表之也

○凡遺人弓者張弓尚筋弛弓尚角右手執簫左手承

弣尊卑垂悅若主人拜則客還辟辟拜主人自受由客

之左接下承弣鄉與客並然後受

遺云貴切筋音斤弛式旨切簫音宵弣音

撫悅始銳切還音旋辟辟  
上蒲亦切下音避鄉音向

鄭氏曰弓有往來體皆欲令其下曲墮然順也遺人  
無時已定體則張之未定體則弛之蕭弭頭也弣把  
中悅佩巾也磬折則佩垂授受之儀尊卑一若主人  
拜拜受也辟拜謙不敢當由從也從客之左右客尊  
之接下接客手下也承弣却手則執蕭覆手與鄉與  
客並謂於堂上則俱南面禮敵者並授孔氏曰此敵  
體故稱遺弓之為體以木為身以角為面筋在外面  
張之時曲來嚮內故遺人時使筋在上弓身曲嚮其  
下其弛之時反張嚮外筋在曲內角在曲外今遺人  
時角嚮其上弓形亦曲嚮下蕭又謂為弣地道貴右  
故推客居右客覆右手執弓下頭又卻下左手以承  
弓把以授主人主人在左弓下頭拄地不淨故自執  
之以上頭授人示敬也尊卑謂賓俱是大夫則為尊  
俱是士則為卑若主人拜受所遺客辟主人之拜不

答拜者執弓不得拜也主人既敵故自受拜客既竟從客左而受之主人既還在客左與客並卻左手接客左手之下而承附又復右手捉弓下頭必知客主俱御左手承附右手執簫者蓋主人用右手承附則是倒執弓也鄉與客並明既拜客竟還前立處與客俱南面而立乃受弓也

○進劔者左首進戈者前其鑄後其刃進矛戟者前其

鑄

鑄在困切又作管切鑄徒對切

鄭氏曰左首尊也後刃敵也三兵鑄鑄雖在下猶為首銳底曰鑄平底曰鑄孔氏曰進謂授與人時也首劔拊環也客在右主人在左劔以首為尊以尊處與人也戈鈎矛戟也如戟而橫安刃但頭不嚮上為鈎也直刃長八寸橫刃長六寸刃下接柄處長四寸並廣二寸用以鈎害人也刃當頭而利故不持向人鑄

在尾而鈍嚮人為敬矛如鉞而三廉也戟兩邊皆安橫刃長六寸中刃長七寸半橫刃下接柄處又長四寸半並廣寸半鐵矛戟柄尾也以平底嚮人敬也亦應並授不云左右而云前後者互文也若相對則前後也若並授則左右也

進几杖者拂之效馬效羊者右牽之效犬者左牽之

鄭氏曰几杖尊者所憑依拂去塵敬也效猶呈見用右手便犬離齧人右手當禁備之孔氏曰前云獻杖執末此云拂之亦互文也几雖無首末亦拂之或云進几者以擊外授人亦順也馬羊多力右手亦有力量故用右手牽掣之少儀云獻犬則右牽之彼是田犬畜犬不齧人此是充食之犬左牽之而右手防禦也執禽者左首飾羔鴈者以續受珠王者以掬受弓劍者

以袂

續胡對切  
掬九六切

鄭氏曰左首尊續畫也諸侯大夫以布天子大夫以畫  
受珠玉以掬慎也掬手中受弓劍以袂敬也孔氏曰執  
禽左首謂橫捧之並投則主人在左以鳥首投之飾  
覆畫布為雲氣以覆羔鴈為飾以相見也士相見禮  
云飾之以布不言續彼是諸侯之卿大夫卑但用布  
此天子之卿大夫尊故畫之也受珠玉置在手中不  
用袂承之恐墜落也受弓劍用衣袂承接不露手取  
之敬也呂氏曰禽謂摯也若卿羔大夫鴈士雉庶人  
鷩工商雞是也士相見禮云摯冬用雉夏用膳左頭  
奉之弓劍藉之以袂文也弓劍比於珠玉不慮其失  
墜故得  
盡其文

飲玉爵者弗揮

孔氏曰玉爵玉杯也何氏曰振去餘酒曰揮鄭氏曰為其寶而脆呂氏曰玉器宜謹故弗揮澄曰此因上文受珠玉以掬而并記之也

### 右記獻遺之禮凡四節

君子不盡人之歡不竭人之忠以全交也

鄭氏曰歡謂飲食忠謂衣服之物澄曰飲食之禮所以致其歡樂饋遺之禮所以致其忠誠受其半而辭其半使彼致歡致忠於我之意常有餘而不竭盡不至于使人厭倦而難繼故曰全交謂全其交接之道使可常也孔氏曰與人交者不宜事事悉受使彼罄盡則交道乃全也游氏曰不盡人之歡若陳敬仲之樂飲而不繼以燭是矣不竭人之忠若孔子出行不假雨具於子夏君子之與人交所以貴辭讓貴有節

皆不盡歡不竭忠之意也記曰不大望於民傳曰舜不窮其民言其望於民者可小而不可大可使有餘而不可使至於窮古人之道大槩如此不獨於禮為然也

○在醜夷不爭

鄭氏曰醜衆也夷猶僻也孔氏曰資賤相臨則有畏憚朋友等輩喜爭勝負故戒之以不爭

○儼人必於其倫

儼與擬同

鄭氏曰儼猶比也倫猶類也比大夫當於大夫比士當於士不以其類則有所棄呂氏曰儼人者必以其德相似也不相似則非倫矣孟子稱禹稷顏子易地則皆然曾子子思易地則皆然儼之得其倫也澄曰或問曾西吾子與管仲孰賢曾西艱然不悅曰爾何曾比予於管仲是儼之不以其倫者也

○知生者弔知死者傷知生而不知死弔而不傷知死而不知生傷而不弔

知謂識其人也鄭氏曰人思各施於所知也弔傷皆謂致命辭也雜記曰諸侯使人弔辭曰寡君聞君之喪寡君使某如何不淑此施於生者傷辭未聞也說者有弔辭云皇天降災子遭罹之如何不淑此施於死者蓋本傷辭辭畢退皆哭孔氏曰此皆不自往而遣使致已之命若存之與亡並識則遣設弔辭傷辭兼行若但識生而不識亡則惟設弔辭而無傷辭若但識亡唯施傷辭而無弔辭也然弔辭乃使口致命若傷辭當書之於版使者讀之而莫致殯前也方氏曰不知死而傷之則其傷也近偽不知生而弔之則其弔也近諂



○弔喪弗能賻不問其所費問疾弗能遺不問其所欲  
見人弗能館不問其所舍賜人者不曰來取與人者不

問其所欲

賻音附遺云  
責切舍去聲

臨川王氏曰不問其所費所欲所舍辭口惠而實不  
至也不曰來取不問其所欲爲人養廉也鄭氏曰見  
人見行人也館舍也與人不問其所欲已物或時非  
其所欲將不與也呂氏曰賜人者使之來取人之所  
難取也與人者問其所欲人之所難言也賜  
之而難取問之而難言非所以惠人之道也

### 右記交游之禮凡五節

博聞強識而讓敦善行而不怠謂之君子

識如字又音  
志行下孟切

鄭氏曰敦厚也陳氏曰博聞強識知之也知常患於不遜篤善行之也行常患於怠知矣而能遜行矣而不怠然後謂之君子蓋聞識自外入善行由中出自外入者易實故處之以虛由中出者易倦故濟之勤以

○若夫坐如尸立如齊禮從宜使從俗

夫音扶齊側皆切使色吏切

鄭氏曰如尸視貌正如齊磬且聽也齊謂祭祀時孔氏曰尸居神位坐必矜莊人雖不為尸所在坐必當如尸之坐凡祭之前有齊於適後中坐而無立今云立者謂祭之日立於神前特非祭前齊戒之齊人之倚立多慢不恭故倚立之時雖不祭祀必須磬折屈身如祭時之齊也澄曰齊謂祭者齊敬之容蓋祭之日為尸者有坐而無立故坐以尸為法主祭者有立而無坐故立以祭者之齊為法坐如尸立如齊六字

大戴記曾子事父母篇之辭曰孝子唯巧變故父母安之若夫坐如尸立如齊弗訢不言言必齊色此成人之善者未得為人子之道也記禮者取此六字而誤畱上文若夫二字坐如尸立如齊敬以持已也禮從宜使從俗義以制事也呂氏曰若夫發語端禮者敬而已矣敬者禮之常也禮時為大時者禮之變也如尸如齊盡其敬也從宜從俗適其時也禮常盡變則禮達之天下而無窮禮有不可行者必變而從宜如老者不以筋力為禮貧者不以貨財為禮之類使於他邦必從其俗故有入境而問禁入國而問俗之禮

○母側聽母噉應母淫視母怠荒遊母倨立母跛坐母箕寢母伏斂髮母髡冠母免勞母袒暑母褰裳

噉古弔切倨音

據跛彼義切又波我切髦徒細切免如字袒徒旱切

鄭氏曰側聽耳屬於垣嫌探人之私也嗷呼號之聲也淫視睇眄也怠荒放散身體也跛偏任也伏覆也髦髮也毋垂餘髮如髮也免去也褰祛也孔氏曰凡人宜正立不得傾歌側聽人之語嗷謂聲響高急如叫之號呼應答宜徐徐而和不得高急也淫謂流移日當直瞻視不得流動邪眄也怠荒謂身體放縱不自拘斂也遊行倨慢身當恭謹不得倨慢也跛謂舉一足一足踏地立宜雙足並立不得偏也箕謂舒展兩足狀如箕舌也寢卧也卧或側或仰而不覆也古人重髮以纚韜之不使垂如髮也免脫也冠常着在首不可脫也袒露也雖有疲勞之事戲患其衣而不得袒露身體暑雖炎熱而不得褰祛取涼也游氏曰人之所患在乎徇其意之所安人之所安其病有五曰傾邪曰輕易曰放縱曰倨慢曰惰偷側聽淫視

傾邪者也。噉應歛髮而髮輕易者也。遊而倨坐而箕  
寢而伏此放縱倨慢者也。怠荒立而跛冠而免勞而  
袒暑而褰裳惰偷者也。五者禮之所禁也。夫禮者內  
以正人之心而外以正其遊行視聽坐立卧起衣冠  
之際此所以止邪於未形也。陳氏曰古之養老則袒  
而割牲祭祀則袒而迎牲饗禮以袒踊為孝。魯服以  
袒免為制士虞則鉤袒取黍稷大射則袒決遂執  
弓然則袒豈先王之所不為無故而袒則非禮也。

○登城不指城上不呼

呼火故切

鄭氏曰不指不呼為惑人。方氏曰不指為其惑人之  
見也不呼為其惑人之聞也。言城者士民之所會而  
聞見者衆也。戴氏曰居十手所指十目所視之地而  
指畫疾呼其不驚人而惑衆者幾希。論語曰車中不  
疾言不親指在車上猶不可况於登城乎。

將適舍求毋固將上堂聲必揚

黃氏曰凡求物於主人毋固毋必隨其有無鄭氏曰適舍謂行而就人館固猶常也求主人物不可以舊常或時乏無聲必揚警內也澄曰暮而求舍館一宿而已隨所在而安不敢必求適意之所也上堂而先

揚其聲使人知所回避也

戶外有二屨言聞則入言不聞則不入將入戶視必下入戶奉扃視瞻毋回戶開亦開戶闔亦闔有後入者闔

而勿遂

屨紀其切開音問又如字奉  
上聲扃古螢切闔胡鵬切

鄭氏曰言聞則入視必下不干掩人之私也奉扃敬也開亦開闔亦闔不以後來變先勿遂示不拒人北

氏曰戶外有二屨謂室有兩人若一人或請問家事若  
事則外人可入若有二屨是有二人或請問家事若  
內人語聞於戶外則非私事外人乃可入也雖聞言  
而入亦不得舉目而視恐觀人之私也故視必下局  
所以開鼎關戶之木與開鼎相似亦得稱局凡常奉  
局之時必兩手向心而奉之今入戶雖不奉局木以  
其手對戶若奉局然言恭敬也初入時視必下而竟  
不得迴轉廣有瞻視也既入戶若戶本開則今入者  
不須闔若戶本闔則今入者不須開已先入後猶有  
應入者雖已應闔戶徐徐欲作闔勢以待後入不得  
遽闔以拒後入

毋踐屨毋踏席振衣趨隅必慎唯諾

踏在亦切振苦侯  
切趨七俱切唯云

癸切諾  
各切

鄭氏曰趨隅升席必由下也慎唯諾者不先舉見問乃應孔氏曰踐蹋也既並脫屣戶外其人或多若後進者不得蹋先入者屣踏猶躡也席既地鋪當有上下將就坐當從下而升以就已位若發初從上為踏席撫提也衣裳也趨猶向也隅猶角也既不踏席當兩手提裳之前徐徐向席之下角從下而升已位也唯諾應對也坐定又慎於應對

○帷薄之外不趨堂上不趨執玉不趨堂上接武堂下

布武室中不翔並坐不橫肱授立不跪授坐不立

薄平博切

肱古橫切

鄭氏曰帷薄之外不見尊者行自由不為容也行而張足曰趨堂上不趨為其迫也堂下則趨執玉不趨



志重玉也武迹也迹相接謂每移足半躡之中人之迹尺二寸布武謂每移足各自成迹不相躡行而張拱曰翔室中不翔亦為其迫也橫肱為害傍人不跪不立為煩尊者俛仰受之孔氏曰帷幔也薄簾也張足疾趨而行敬也賁賤各有臣吏故其敬處亦有遠近禮天子外屏諸侯內屏卿大夫以簾士以帷臣來朝君至屏而加肅屏外不趨也帷薄外不趨謂大夫士外不趨內趨為敬也堂上迫狹故亦不疾趨下階則趨故論語云沒階趨執玉須慎疾趨則或蹉跌失玉故不論堂之上下皆不疾趨也堂上不疾趨故迹相接每進六寸也呂氏曰凡見尊者以疾行為敬然有不必趨者惟薄之外非尊者所見可以紓其敬也有不可趨者堂上地迫不足以容步執玉之重或虞其失墜也陳氏曰文者上之道武者下之道故足在體下曰武綏在冠下亦曰武執玉不趨不敢趨也室中不翔不可翔也方氏曰趨足容也翔手容也堂上

不趨則未必不翔室中不翔則不趨可知授立不跪為煩尊者之俯也授坐不立為煩尊者之仰也

### ○離坐離立毋往參焉離立者不出中間

鄭氏曰為干人私也離兩也孔氏曰見彼二人併坐或併立恐密有所論已不得往參預二人併立當已行路則辟之不得與當其中間出也方氏曰兩相麗之謂離三相成之謂參彼坐立者兩人而我一人往焉則成三矣

### ○有憂者側席而坐有喪者專席而坐

鄭氏曰側猶特也憂不在接人不布他面席專猶單也專席降居處也孔氏曰憂謂親有疾吉時貴賤有重席之禮若父母始喪寢苦無席卒哭後乃有芻蕭不納自齊衰以下始喪而有席並不重也王氏曰側

席與儀禮所謂側殺側受醴之側同專席與郊特牲所謂專席而酢之專同呂氏曰側席坐不安也專席不與人共坐也

○居喪不言樂祭祀不言凶公庭不言婦女

鄭氏曰非其時也呂氏曰古者吉凶之事不相干哀樂之情不可以貳喪凶事也不言樂祭祀吉事也不言凶如臨喪不笑臨樂不歎之比肅敬者公庭之事燕褻者私庭之事也婦人私褻之事不可以言於公庭馬氏曰斬衰之喪唯而不對齊衰之喪對而不言大功之喪言而不及議小功之喪議而不及樂又況大於此而可言樂乎古者易服而葬周官蜡氏凡大祭祀禁凶服祭義郊之祭喪者不敢哭以為交於神明者不可以凶也又況祭祀可言凶乎男外女內言不出外言不入欲無相瀆而已又況公庭可言婦女

手居喪不言樂後世猶有如衛孫文子者  
公庭不言婦女後世猶有如陳靈公者

# ○齊者不樂不弔

齊側皆切  
樂音洛

鄭氏曰為哀樂則失正散其思也呂氏曰齊者專致其精明之德恍惚以與神明交者也樂則散哀則動皆有害於齊也故不樂不弔全其所以齊之志也方氏曰致齊將以致祭也故不以哀樂惑其心

# ○鄰有喪春不相里有殯不巷歌

春書容切相息亮切殯必刃切

鄭氏曰助哀也相送杵聲方氏曰五家為隣五鄰為里鄰近而里遠鄰家而里衆近而寡者其情昵遠而衆者其情疎故哀不能輕重淺深之別焉除喪而後祥故未祥之前通謂之有喪啓殯而後葬故未葬之前通謂之有殯於鄰言有喪春不相則有殯可知於里言有殯不巷歌則有喪必然矣春猶不相則不

巷歌可知不巷歌  
則容或相舛矣

適墓不歌哭日不歌望柩不歌入臨不翔臨喪不笑執

紼不笑臨樂不歎當食不歎

柩音舊臨如字  
或去聲紼音弗

鄭氏曰適墓非樂所哭日哀未忘望柩入臨哀傷之  
無容樂臨喪宜有哀色紼引車索食或以樂非歎所

孔氏曰哭日謂弔人日哭歌不可共日弔之朝亦得  
歌樂但弔以還哭後乃不歌也不翔謂入臨人之喪

不得趨翔為容不翔則不歌不歌則猶翔也吉食奏樂  
既樂故不宜歎若助喪事而食使充飢不令廢事亦

不宜歎歎  
則不飽也

適墓不登壟送喪不由徑送葬不辟塗潦助葬必執紼

揖人必違其位

壁力勇切  
辟音避

鄭氏曰墓塋域塋冢也不登塋者為其不敬不由徑不辟塗潦者所哀在此助葬必執紼者葬喪之大事揖人必違其位者禮以變為敬孔氏曰助葬非為客是助事爾故宜執紼位謂已之位也於位而見人則當離已位而向彼遙揖燕禮君降階爾卿大夫爾謂揖而移近之雖君臣皆須違位而揖也

臨喪則必有哀色介冑則有不可犯之色故君子戒慎不失色於人

鄭氏曰貌與事宜相配色厲內荏貌恭心狠非情者也介甲也孔氏曰若身被甲首冠冑則使形勢高岸有不可干犯之色以稱其服也君子接人並使心色如一不得色違於心故云不失色於人

○介者不拜爲其拜而菱拜

爲云偽切菱子卧切

陳氏曰介者所以服人拜者所以服於人服人者無所服於人故不拜兵法曰軍容不入國國容不入軍軍容入國則民德廢國容入軍則民德弱兵車不式危事不齒介者不拜不以國入軍也鄢陵之戰卻至不拜楚使峭之役蹇叔之子不拜其父細柳之營周亞父不拜其君可謂知此矣朱子曰菱猶言有所枝柱不利屈伸也鄭氏曰菱則失容節菱猶詐也孔氏曰菱挫也戎容暨暨著甲而屈拜則挫損其戎威之容也一云詐言著鎧而拜威儀不足虛作矯菱是詐也

○貧者不以貨財爲禮老者不以筋力爲禮

鄭氏曰禮許儉不非無也年五十始杖八十拜君命一坐再至陳氏曰禮非貨財不足以爲文非筋力不

足以為儀貧者不足於貨財老者不足於筋力於其所不足而責之以為禮則不恕矣呂氏曰君子之於禮不責人之所不能備不責人之所不能行

○禮不下庶人刑不上大夫

上時掌切  
下不上同

鄭氏曰禮不下庶人者為遽於事且不能備物刑不上大夫者不與賢者犯法其犯法則在八議輕重不在刑書孔氏曰禮為有知制刑為無知設禮不下與庶人行故不著於經非是都不行禮也有事則假士禮行之制五刑三千之科條不設大夫犯罪之目所以然者大夫必用有德若逆設其刑則是君不知賢也雖不制刑書非謂都不刑其身也其有罪則以八議議其輕重澄曰禮謂禮書禮書所制之禮上自天子始而下及諸侯又下及卿大夫又下及士而止不下及庶人也刑謂刑書刑書所制之刑下自庶人始



而上及於士而止  
不上及大夫也

### ○刑人不在君側

鄭氏曰爲怨恨爲害也春秋傳曰近刑人則輕死之  
道孔氏曰被刑害者不得令近君春秋閻弑吳子餘  
祭刑人在君側之失也

### ○犬馬不上於堂

鄭氏曰非摯幣也孔氏曰賓主相見將犬馬爲禮用  
充庭實而已犬則執繼馬則執靽以呈之非摯幣故  
不牽上堂羔鴈  
之摯乃上堂也

## 右記通用之禮凡十五節

# 卒哭乃諱

鄭氏曰敬鬼神之名也諱辟也生者不相辟名衛侯名惡大夫有名惡君臣同名春秋不非孔氏曰古人生不諱故卒哭前猶以生事之則未諱至於卒哭後服已受變神靈遷廟乃神事之言之則感動孝子故名也諱其名也

# 禮不諱嫌名二名不偏諱

鄭氏曰嫌名謂音聲相近若禹與兩丘與區也偏謂二名不一一諱也孔子之母名徵在言在不稱徵言徵不稱在

逮事父母則諱王父母不逮事父母則不諱王父母

鄭氏曰逮及也謂幼孤不及識父母恩不至於祖名孝子聞名心懼諱之由心此謂庶人適士以上廟事祖雖不逮事父母猶諱祖庾氏蔚曰諱王父母之恩正應由父所以連言母者婦事舅姑同事父母且配夫為體諱敬不殊故幼無父而識母者則諱王父母也張子曰先君以獻武諱二山是雖數世猶諱也澄曰鄭註以此為庶人禮謂適士以上諱祖則諸侯卿大夫諱祖可知矣

○君所無私諱大夫之所有公諱

鄭氏曰無私諱謂臣言於君前不辟家諱尊無二也大夫之所則辟君諱也孔氏曰人於大夫之所止得辟公家之諱不得辟大夫諱也所以尊君也

夫人之諱雖質君之前臣不諱也

鄭氏曰質猶對也臣於夫人之家恩遠也孔氏曰夫人君之妻夫人本家所諱臣雖對君前而言語不為諱也

## 婦諱不出門

鄭氏曰婦親遠於宮中言辟之孔氏曰門謂婦宮門婦家之諱但於婦宮中不言爾若於宮外則不諱也故臣對君前不諱夫人之諱田氏瓊曰雜記母之諱宮中諱妻之諱不舉諸其側此婦諱與母諱同者雜記分尊卑此據不出門大畧言之爾

## 大功小功不諱

孔氏曰古者期親則為諱田氏瓊曰雜記卒哭乃諱王父母兄弟世父叔父姑姊妹子與父同諱父諱齊

衰親也然則大功小功不諱矣熊氏云大功亦諱小功不諱若小功與父同諱則亦諱之馬氏曰曲禮言王父母則於已為祖者也雜記言王父母則於父為祖者也於父為祖則於已為曾祖而其服則小功於父為世父叔父姑則於已為從祖祖姑而其服亦小功於父為姊妹則於已為姑而其服則期與大功凡此以父為之諱而諱之是大功小功有所謂諱也大功小功不諱言其不與父同諱者而已

### 廟中不諱詩書不諱臨文不諱

鄭氏曰廟中謂有事於高祖則不諱曾祖以下尊無二也於下則諱上何氏曰詩書謂教學時也臨文謂執禮文行事時也論語云詩書執禮是教學唯詩書有誦禮則不誦唯臨文行事若有所諱則並失事正胡氏曰詩書謂誦詩讀書時臨文謂文章舊云禮文恐非李氏曰箕子為武王陳洪範曰邦其昌臨文不


諱也

○入竟而問禁入國而問俗入門而問諱

竟與境同

鄭氏曰皆為敬主人也禁謂政教俗謂常行與所惡也國城中也孔氏曰竟界首也凡至竟界當先訪問國中政教何所禁忌入國門內城中亦先問風俗所常行也門主人之門諱主人祖先君名欲為避之宜先知之主人出至大門外迎客客入門方應交接故問諱以門為限也呂氏曰問禁若孟子言問國之大禁然後敢入是也問俗謂其國之禮俗有與它國不同者也問諱賓為主人諱也私諱不出門門之內雖賓亦得諱之所以敬主人也王氏曰邑國皆有竟竟內各有禁俗繫於國國殊則有異俗國非特城中而已

右記避諱之禮凡三節



禮記纂言卷一中



欽定四庫全書

經部  
禮記纂言卷一下

詳校官通政使<sub>臣</sub>夢吉

給事中<sub>臣</sub>溫常綬覆勘

總校官編修<sub>臣</sub>王燕緒

校對官中書<sub>臣</sub>潘奕嵩

謄錄監生<sub>臣</sub>俞昌言

欽定四庫全書

禮記纂言卷一下

元 吳澄 撰

曲禮

君子將營宮室宗廟爲先廡庫爲次居室爲後凡家造

祭器爲先犧賦爲次養器爲後

廡九又切造才早切犧許宜切養羊尚切

鄭氏曰先宗廟次廡庫重先祖及國之用家造謂家始造事犧賦以稅出牲孔氏曰賦斂邑民供出牲牢

故曰犧賦養器供養人之飲食器也呂氏曰營宮室雖大夫有宗廟皆然非獨諸侯也言家造雖士有田

祿者皆然非獨大夫也宗廟祭器事吾先也廡庫犧賦待吾衆也居室養器奉吾私也此先後之序也廡

以養牛馬犧牲庫以藏兵也犧賦亦謂其器也犧牲之器如牢互盆條之屬也賦兵賦也其器如弓矢旗物戈劍之屬也澄曰凡家造謂凡人家所造之器犧賦謂犧牲兵賦之器呂說得之

無田祿者不設祭器有田祿者先爲祭服君子雖貧不

粥祭器雖寒不衣祭服爲宮室不斬於丘木

粥音育衣於計切

方氏曰無田祿者不設祭器故禮運以祭器不假爲非禮有田祿者必具祭服故王制以祭器不假爲禮鄭氏曰祭器可假有田祿者祭服宜自有粥賣也丘壘也不粥不衣不斬廣敬也孔氏曰大夫及士有田祿者乃得造器猶不具唯天子大夫四命以上者得備具若諸侯非四命無田祿則不得造故禮運云大夫聲樂皆具祭器不假非禮也據諸侯大夫言之也若有田祿雖得造器必先爲祭服後爲祭器緣人形

參差衣服有大小不可假借故宜先造而祭器之品  
量其制同既可暫假故營之在後呂氏曰孟子曰惟  
士無田則亦不祭牲殺器皿衣服皆不備故也不祭  
則薦而已與庶人同故不設祭器也有田祿則牲殺  
器皿衣服皆不可不備祭器所以事其先粥之則無  
以祭無以祭則不仁也祭服所以接鬼神衣之則衰  
乘則不敬也丘木所以庇其宅兆為宮室  
而斬之是慢其先而濟吾私亦不敬也

○祭服敝則焚之祭器敝則埋之龜筮敝則埋之牲死

則埋之

筮與策同

鄭氏曰祭服祭器龜筮並牲皆不欲人乘之焚之必  
已不用埋之不知鬼神之所為孔氏曰服是身著之  
物故焚之牲器之類並為鬼神之用雖敗不知鬼神  
用與不用故埋之埋之猶在焚之則消所以焚之埋

之異也若不焚埋人或用之為褻慢鬼神之物也

○臨祭不惰

惰徒卧切

鄭氏曰惰為無神也孔氏曰祭如在故臨祭須敬不得怠惰鬼神饗德祭若怠惰則神不歆

○凡祭於公者必自徹其俎

鄭氏曰祭於公助祭於君也自徹其俎臣不敢煩君使也大夫以下或使人歸之孔氏曰此謂士助君祭大夫以下自祭其廟則使人歸賓俎

○禮曰君子抱孫不抱子此言孫可以為王父尸子不可以為父尸

鄭氏曰以孫與祖昭穆同孔氏曰禮曰者皆舊禮語也抱孫不抱子謂祭祀之禮必須尸尸必以孫今子孫行並皆幼弱則必抱孫爲尸不得抱子爲尸作記者旣引禮又自解云此言孫可以爲王父尸子不可以爲父尸故也曾子問云尸必以孫孫幼則使人抱之無孫則取於同姓可也方氏曰凡爲尸者不必皆幼必曰抱以見禮之所在不以幼而廢也王氏矣曰特牲禮注大夫士以孫之倫爲尸言倫明非已孫崔靈恩謂大夫用已孫爲尸非也張子曰父於子尊嚴故不抱孫自有其父故在祖則可抱非謂爲尸而抱也尸是孫行反以子道事之則事親之道可以喻矣澄按張子之意謂君子於生之時爲祖者抱其孫而爲父者不抱其子故死而立尸以祭可以孫行爲尸而不可以子行爲尸也然曾子問篇旣有孫幼則使人抱之之文則不若舊註之說爲當

○支子不祭祭必告于宗子

鄭氏曰不敢自專孔氏曰支子庶子也祖禰廟在適子之家而庶子賤不敢輒祭之也支子雖不得祭若宗子有故庶子代攝猶宜告宗子然後祭程子曰古所謂支子不祭者唯使宗子立廟主之而已支子雖不祭至於齊戒致其誠意則與主祭者不異可與則以身執事不可與則以物助但不別立廟為位行事而已而

○凡祭有其廢之莫敢舉也有其舉之莫敢廢也

鄭氏曰爲其瀆神也廢舉謂若殷廢農祀棄後不可復廢棄祀農也孔氏曰祭有常典不可輒擅廢興與呂氏曰廢之莫敢舉如已毀之廟已變置之社稷不可復祀也舉之莫敢廢如已修之壇墠而輒毀已正之

昭穆而輒變也陳氏曰祀典之所秩則不可以廢廢之爲不仁祀典之所不秩則不可以舉舉之爲不智周官大祝禁督逆祀命者禮記山川神祇有不舉者爲不敬不敬者君削以地宗廟有不順者爲不孝不孝者君絀以爵夫逆祀命而有所舉則在所禁逆祀命而有所廢則在所督不敬者在所削不孝者在所絀此人臣所以謹常祀而毋瀆禮也

### 非其所祭而祭之名曰淫祀淫祀無福

鄭氏曰妄祭神不饗呂氏曰非其所祭如法不得祭與不當祭者淫過也以過祀神故無福福者百順之名也陳氏曰神不歆非類民不祀非族非族而祀之則於禮爲諂於命爲逆於祀爲瀆其欲徼福也難矣昔楚昭王不祀河甬武子不祀相皆能變易舊俗以趨於正知此禮矣



○天子祭天地祭四方祭山川祭五祀歲徧諸侯方祀祭山川祭五祀歲徧大夫祭五祀歲徧士祭其先

鄭氏曰祭四方謂祭五官之神於四郊也勾芒在東祝融后土在南蓐收在西玄冥在北詩云來方禋祀方祀者各祭其方之官而已五祀戶竈中霤門行也孔氏曰天地有覆載大功天子王有四海故得祭天地以報其功諸侯既不得祭山川又不得總祭五方之神惟祀當方故云方祀山川在其地則祭之無則不祭大夫不得方祀及山川直祀五祀而已士祭其先不云歲徧者以士祭先祖歲有四時更無餘神故也呂氏曰天子繼天而王君天下而有之冬日至祀天夏至祭地四時各祭其方以迎氣又各望祭其方之山川及五祀此所謂歲徧也天子有天下故得祭天地四方山川五祀言無所不及也諸侯有國國

必有方祭其所居之方而已非所居之方及山川不在竟內者皆不得祭故曰方祀祭山川祭五祀言有及有不及也大夫有家不與山川之祀所得祭者五祀而已士不得立家故五祀之祀亦不得行然自天子至於庶人皆得祭其先先者吾身之所自出也天子至大夫言祭百神而不及其先唯於士言者舉輕以明重且言士有不得祭者也方氏曰天子祭天地則天下之事諸侯方祀則一國之事大夫祭五祀則一家之事士祭先則一身之事蓋德有隆殺故所祭之神有大小業有廣狹故所祭之神有遠近也

○天子以犧牛諸侯以肥牛大夫以索牛士以羊豕

索

切百

鄭氏曰犧純毛也肥養於滌也索求得而用之孔氏曰大夫士天子大夫士也若諸侯大夫即用少牢士

則用特牲其粢祭大夫亦得用牛士亦用羊豕故雖  
記云上大夫之虞也少牢卒哭成事祔皆大牢下大  
大夫之虞也牲卒哭成事祔皆少牢是也據此諸  
侯不得用犧牛祭義云天子諸侯有養獸之官犧牲  
祭牲必於是取之者蓋諸侯對卿大夫亦得云犧若  
對天子則稱肥爾其大夫牲體完全亦有犧牲之稱  
故上云大夫犧賦為次但不毛色純爾按楚語觀射  
父云大夫牛羊必在滌三月小者犬豕不過十日此  
大夫索牛士羊豕既不在滌三月當十日以上但不  
知其日數耳方氏曰天子以犧牛則雖肥而或傷亦  
在所不用諸侯但取其肥而已不必犧也大夫但取  
其具而已又不必肥也至於士雖索牛亦不得而用  
矣唯羊豕可也祭義言天子諸侯必有養獸之官故  
得有犧肥之牛也牛人凡祭祀共其求牛此特於大  
夫言索者以無養獸之官必索  
後得之也羊豕者或羊或豕也

○大饗不問卜不饒富

鄭氏曰大饗祭帝於明堂也富之言備也備而已勿多於禮也孔氏曰此大饗與月令季秋大饗帝同不得以其大饗豐饒其物使之過禮葉氏曰季秋大饗於明堂牲也日也莫不卜也特言不問者恐瀆神也方氏曰禮之言大饗者十有一而其別有五祭帝一也祫祭先王二也天子饗諸侯三也兩君相見四也凡饗賓客五也若月令季秋大饗帝禮器郊特牲大饗腥祭帝之大饗也禮器又言大饗其王事大饗之禮不足以大旅祫祭先王之大饗也郊特牲又言大饗尚服脩天子饗諸侯之大饗也郊特牲又言大饗君三重席而酢仲尼燕居言大饗有四坊記言大饗廢夫人之禮兩君相見之大饗也大司樂言大饗不入牲雜記言大饗卷三牲之俎凡饗賓客之大饗也

右記祭祀之禮凡十節

外事以剛日內事以柔日

鄭氏曰順其出外為陽順其居內為陰孔氏曰外事郊外之事內事郊內之事十日有五奇五耦甲丙戊庚壬五奇為剛乙丁己辛癸五耦為柔然郊天在國外應用剛日而郊特牲云郊用辛社稷是郊內應用柔日而郊特牲云社日用甲郊社尊不敢同內外之義自郊社之外則皆用之社祭用甲而召誥用戊者召誥是告祭非常禮也郊之用辛者惟夏正郊天及雩大享明堂爾若郊丘自用冬至日五時迎氣合用其初朔之日不皆用辛也崔靈恩云外事指用兵之事內事指宗廟之祭澄曰詩小雅吉日田獵之詩而曰吉日維戊吉日庚午春秋桓六年壬午大閱莊八年甲午治兵田獵兵師外事也故戊庚壬甲皆用剛

日桓八年己卯癸丑癸十四年乙亥嘗閏二年乙酉吉禘于莊公文二年丁卯大事于太廟宣八年辛卯有事于太廟昭十五年癸酉有事于武宮儀禮少牢饋食日用丁巳宗廟祭享內事也故己丁乙辛癸皆用  
柔日

○凡卜筮日旬之外曰遠某日旬之內曰近某日喪事  
先遠日吉事先近日

鄭氏曰旬十日也喪事葬與練祥也吉事祭祀冠取之屬也孔氏曰凡卜筮者若大事則卜筮並用皆先筮後卜若次事則惟卜不筮小事則無卜唯筮天子既爾諸侯亦然但春秋亂世皆先卜後筮尚書先云龜從者以尊卑言之鄭註周禮云筮凶則止不卜而洪範有筮逆龜從者崔靈恩云凡卜筮天子皆用三

若三筮並凶則止鄭云若一吉一凶雖筮逆猶得卜之洪範所云是也大夫士則大事卜小事筮旬之外者少牢大夫禮今月下旬筮來月上旬是旬之外日也主人告筮者云欲用遠某日旬之內者按特牲士禮不諏日註云士賤職褻時至事暇可以祭則筮其日於旬初即筮旬內之日是旬之內日也主人告筮者云用近某日此據大夫士有旬內旬外之日若天子諸侯其有雜祭或用旬內或用旬外其辭皆與此同喪事謂葬與二祥哀非孝子所欲但制不獲已故卜先從遠日而起左傳云卜葬先遠日辟不懷也謂如今月下旬先卜來月下旬不吉卜中旬不吉卜上旬是先遠日也吉事謂祭祀冠昏之屬少牢云若不吉則及遠日又筮日如初是先近日也

曰爲日假爾泰龜有常假爾泰筮有常

鄭氏曰命龜筮辭孔氏曰假因也爾女也指龜著泰太中之太也褒美龜筮故謂泰龜泰筮也有常者言爾泰龜泰筮決判吉凶分明有常也方氏曰龜則卜之體筮則著之用一言其體一言其用互相備也馬氏曰布席謂之為席擇日謂之為日以其有所為故也大羹謂之泰羹瓦尊謂之泰尊龜謂之泰龜筮謂之泰筮以其有所尊故也目有光而不能明假日月而後明事有吉凶而不能知假著龜而後知故假爾龜假爾筮事之萬變不同理之是非不一卜筮而體吉則吉體咎則咎故曰有常

○卜筮不過三卜筮不相襲

鄭氏曰求吉不過三魯四卜郊春秋譏之孔氏曰一卜不吉而凶又卜以至於三三若不吉則止筮亦然澄曰襲因也重也謂一卜不吉雖可再卜再卜不吉雖可三卜然須俟他日然後再卜三卜不可於一卜



再卜之日而相因重複以卜蓋  
誠不專一且瀆神也筮亦然

○龜爲卜筮爲筮卜筮者先聖王之所以使民信時日  
敬鬼神畏法令也所以使民決嫌疑定猶與也故曰疑

而筮之則弗非也日而行事則必踐之

與音預踐  
今讀如字

筮著也著莖如馬蒿故謂之筮爲卜爲筮釋卜筮一  
字謂以龜甲鑽之而得兆者名爲卜以著筮揲之而  
得卦者名爲筮也卜筮之用有二占日與占事也用  
之以占日者使民信時日也用之以占事者使民決  
嫌疑也信與信如四時之信同時者謂當其時之日  
法謂法制令謂禁令事似同而非同爲嫌心有二而  
不決爲疑猶與二獸名猶獬屬或云犬子與象屬一  
作豫二獸皆進退多疑故人之遲疑不決者曰猶與

凡享祀鬼神設施法令必須擇日然人不自擇而問之卜筮卜筮所得之日乃神所告故人信之而不敢輒易享祀必以此日是於法令畏而不敢慢也事已然者或謂必以此日是於法令畏而不敢慢也事已然者或謂其可或謂其否事未然者或謂如此或謂如彼兩有所嫌而心疑不決故其為之之意猶與以卜筮決其可否彼此之嫌而心不復疑則行之勇而不猶與也故曰以下引舊語為證踐猶踐言之踐疑而筮之申上文決嫌疑之義謂有疑者既卜筮而決之則心知其是不復以為非也不云卜省文日而行事中上文信時日之義謂卜筮謂此日而行事必須踐行而不敢違也

### 右記卜筮之禮凡四節

凡僕人之禮必授人綏若僕者降等則受不然則否若

僕者降等則撫僕之手不然則自下拘之

拘古  
虔切

鄭氏曰撫小止之謙也自下拘之由僕手下取之也僕與己同爵則不交孔氏曰凡僕人謂為一切僕非但為君僕時也車上既僕為主故為人僕必授綬與所升之人也降等謂士與大夫大夫與卿御也僕既卑降則主人受取綬不然謂僕者敵體則主人宜謙不受其綬也又僕者雖卑而受其綬不謙猶當撫止僕手若不聽自授然後乃受也不降等者既敵不受而僕者必授則主人當卻手從僕手下自拘取之示不用僕授也

○僕御婦人則進左手後右手御國君則進右手後左手而俯

鄭氏曰進左後右遠嫌也進右後左敬也孔氏曰僕在中央婦人在左僕御之時進左手持轡使形微相背若進右手則近相嚮故後右手以遠嫌御國君則以相嚮為敬故進右手既御不得常式故但俯僂

○君車將駕則僕執策立於馬前已駕僕展軫效駕奮

衣由右上取貳綏跪乘執策分轡驅之五步而立君出

就車則僕并轡授綏左右攘辟車驅而騶至於大門君

撫僕之手而顧命車右就車門閭溝渠必步

軫力丁切  
上時掌切

乘繩證切下並同并必證切據如羊切  
辟音闢或音避騶齊勾切又七須切

鄭氏曰立於馬前監駕且為馬行展軫具視效駕白已駕奮振去塵也貳副也跪乘未敢立敬也驅之五步

調試之僕并轡授綬者車上僕所主也左右謂羣臣陪位侍駕者攘卻也車右勇力之士備制非常者君行則陪乘君式則下步行孔氏曰君車君所乘之車也將駕謂始欲駕行時也僕即御車者策馬杖也別有人牽馬駕車僕執馬杖監駕立馬前恐馬行也已駕駕竟也展視軫輪頭轡也車行由軫故具視之效白也僕監視駕竟而入白君駕車也由從也僕入白駕竟先出就車於車後自振其衣去塵從右邊升上必從右者君位在左故辟君空位也綬登車索綬有二一是正綬擬君之升一是副綬擬僕右之升故僕振衣畢取副綬而升也跪乘者僕先試車時君未出未敢依常而立故跪乘以為敬轡御馬索也車有一轅而四馬駕之中央兩馬夾轅者名服馬兩邊者名驂馬每馬兩轡四馬八轡以驂馬內轡二繫於軾前其驂馬外轡及夾轅兩服馬各二轡分置兩手今言執策分轡謂一手執馬杖以三轡置空手中以三轡

置杖手中也。分轡竟則試驅行之。五步乃立。初跪而驅。今馬行五步則倚立以待君出。蓋跪以見敬而立則調試之也。君出就車則僕并六轡及策置一手。中一手取正綏授君。令登車。此當右手并轡。左手授綏。轉身向後引君上也。避遠也。君已上車。車欲進行。故左右侍駕陪位。諸臣皆還卻以辟車。使不妨車行也。左右已辟。故驅車而進。則左右從者疾趨從車行也。大門君之外門車行至外門。君撫僕手。撫按止也。僕手執轡。車行由僕君欲令駐車。故抑止僕手也。顧回顧也。車右勇力之士也。車行則有三人。君在左。僕人中央。勇士在右。車方驅時。勇士亦從驅。在後。今至大門。方出。履險阻。恐有非常。故回顧。命車右。上車也。門間謂凡所過門間溝廣深四尺。渠亦溝也。步謂下車也。此車右勇士之禮。若至門間溝渠。則車右必下車。所以然者。君子不誣。十室過門。閭閻必式。君式則臣當下也。二則溝渠是險阻。恐有傾覆。故勇士亦須下扶。

持之僕不下者車行由僕  
僕下則車無御故不下也

○國君不乘奇車車上不廣欵不妄指立視五雋式視

馬尾顧不過轂國中以策彗卹勿驅塵不出軌

不乘平聲奇居

宜切欵開代切雋惠圭切轂音谷彗音遂卹蘇沒切勿舊音沒今讀如字屬下句軌君美切

鄭氏曰國君出入必正奇車獵衣之屬廣欵為若自矜廣猶宏也立平視也雋猶規也謂輪轉之度式視馬尾小僂也顧不過轂為掩在後彗竹帚卹勿搔摩也孔氏曰國君不可乘奇邪不正之車獵車之形今鈎車也衣車如鱉而長漢桓帝時禁臣下乘之車已高若在上而聲大欵似自驕矜又驚衆也妄虛也車上無事虛以手指麾四方並為惑衆也車輪一周為一規乘車之輪高六尺六寸徑一圍三三六十八得

一丈八尺又六寸為一尺八寸總一規為一丈九尺八寸五規為九十九尺六尺為步總為十六步半在車上所視則前十六步半也馬引車其尾近在車欄前故車上馮式下頭時不得遠矚而視馬尾若轉而顧不得過轂過轂則掩後人之私入國不馳故不用鞭策取竹帚帶葉者為杖形如埽帚故云策藝以策微近馬體不欲令疾也但搔摩之其狀卹勿然車行遽故塵埃不飛揚出車轍外澄曰藝帚也此作虛字用猶云掃也非是取竹之帶葉形如埽帚者別為策藝以代常時所用之策也卹與恆同音依註讀為蘇沒切猶云拂也藝卹謂埽拂之或云如藝帚之卹拂也卹字句絕勿讀如字驅謂以策策馬令疾行也勿驅二字為句以策藝卹而勿驅者言車行國中宜徐不宜疾但以馬策埽拂馬背勿鞭蓋之兩轅中間相去之度為軌馬行不疾則車塵不遠故不出軌也



○入國不馳入里必式故君子式黃髮下卿位

鄭氏曰馳善簡人不馳愛人也必式不誣十室也發句言故明此衆篇雜辭也式黃髮敬老也下卿位尊賢也卿位卿之朝位君出過之而上車入未至而下車孔氏曰國中人多周官脩閭氏禁馳騁於國中二十五家為里里巷首有門論語云十室之邑必有忠信故入里則必式而禮之君子謂人君也人初老則髮白太老則髮黃髮黃彌老宜敬之故見而式也卿位路門之內門東北面位也

○國君撫式大夫下之大夫撫式士下之

車式高三尺二寸較高五尺五寸在車常憑較敬則撫式鄭氏曰撫猶據也據式小俛崇敬也孔氏曰謂君臣俱行君式宗廟則臣宜下車若士為大夫之臣亦如大夫之於君也呂氏曰下之敬重於式所敬皆

降一等也

○爲君尸者大夫士見之則下之君知所以爲尸者則

自下之尸必式乘必以几

鄭氏曰下下車也所以尊尸國君或時幼小不能盡識羣臣有以告者乃下之尸必式禮之也乘以几尊者慎也孔氏曰爲君尸謂臣爲君作尸者已被卜告君許用者也古者致齊各於其家散齊亦猶出在路及祭日之旦俱來入廟故羣臣得於路見君之尸皆下車而敬之君若於散齊之時在路見尸亦自下車敬之云君知者言知則有不知謂君年或幼小不能盡識羣臣故於路或不識而臣告君君乃知之所以下也知是散齊者君致齊不復出行若祭日君先入廟後乃尸至尸在廟中尊仲答主人之拜今在路其

尊猶屈不敢亢禮君下而已不可下車故式爲敬以答君也乘必以几者几案在式之上尊者有所敬事以手據之几上有審君以羔皮以虎緣之也

○國君下宗廟式齊牛大夫士下公門式路馬

齊側皆切

舊本作下齊牛式宗廟熊氏曰文誤當以周禮齊右註爲正孔氏曰按齊右職註引曲禮云國君下宗廟式齊牛公門君之門也路馬君之馬也敬君故至門下車重君物故式路馬

○祥車曠左乘君之乘車不敢曠左左必式

乘君平聲下乘路同

鄭氏曰祥車葬之乘車曠左空神位也乘君車不曠左君存惡空其位也孔氏曰祥猶吉也吉車謂生時所乘葬時因爲魂車鬼神尚吉故魂乘吉車也車上貴左故僕在右空左以擬神也乘車謂君之次路王

者五路玉象木金革王自乘一路餘四路皆從行臣若乘此車不敢空左若曠左則似祥車近於凶時故乘者自居左也雖處左而不敢自安故恆憑式乘車則君在左若兵戎革路則君在中央御者居左陳氏曰君處左車右處右僕處中此特乘車為然馬氏曰乘君之乘車不敢曠左不敢虛君位也左必式不敢位也安君位也

○乘路馬必朝服載鞭策不敢授綏左必式步路馬必

中道以足蹙路馬芻有誅齒路馬有誅

朝音潮蹙子六切芻初俱切

鄭氏曰載鞭策不敢執也齒欲年也誅罰也孔氏曰乘路馬謂臣行儀習禮獨行時也路馬君之車馬臣雖得乘之必朝服而自御又不敢杖馬但載杖以行也君在則僕人授綏今習儀者身既居左自御而乘

雖有車右不敢授綏與已也既不曠左故居左但式以為敬步猶行也謂單牽君馬行時必在中道正路為敬也芻食馬草也蹙謂以足蹴踰之及論量君馬歲數皆為不敬必被責罰也

### ○客車不入大門婦人不立乘

鄭氏曰不入大門謙也不立乘異於男子孔氏曰公食大夫禮賓之乘車在大門外西方註云賓車不入廣敬也立倚也男子倚乘婦人質弱不倚乘而坐乘

### ○兵車不式武車綏旌德車結旌

綏耳佳切

鄭氏曰兵車尚威武不崇敬武車亦兵車綏謂垂舒之盡飾也德車乘車結謂收斂之不盡飾也孔氏曰兵車革路武猛宜無推讓故不為式敬也武車亦革路建戈刃云兵車取其威猛云武車旌謂車上旗旂

尚威武故舒散旗旛垂綏然何屑云垂放旌旗之旒以見美也德車謂玉輅金輅象輅木輅四路不用兵故曰德車德美在內不尚赫奕故纏結其旒著於竿也何屑云以德為美故略於飾呂氏曰綏上車繩也綏旌者其旒垂曳如車之綏結旌者斂藏於杠發揚者武故旌垂曳斂藏者德故旌收結

## 右記乘車之禮凡十二節

### 史載筆士載言

鄭氏曰史士從於會同各持其職以待事也筆謂書具之屬言謂會同盟要之辭孔氏曰史謂國史書錄王事者王若舉動史必書之王若行佐則史載書具而從之也不言簡牘而言筆者筆是書之主則餘載可知士謂司盟之士言謂舊事若尋舊盟或用舊會之禮應須知之故載以自隨也

前有水則戴青旌前有塵埃則戴鳴鳶前有車騎則戴

飛鴻前有士師則戴虎皮前有摯獸則戴貔貅

埃鳥來切鳶悅

專切騎其寄切摯音至  
貔貅文切貅許求切

戴舊作載陸氏釋文音戴云一作載鄭氏曰戴謂舉  
於旌首以警衆也禮君行師從卿行旅從前驅舉此  
則士衆知所有舉各以其類象青青雀水鳥鳶鳴  
則將風鴻取飛之有行列也士師謂兵衆虎取其有  
威勇也貔貅亦摯獸孔氏曰王行宜警備善惡必先  
知之又軍陣卒伍行則並銜枚無喧聲若有非常不  
能傳道且人衆廣遠難可周徧故前有變異則舉類  
示之左傳云前茅慮無是也青旌謂畫為青雀旗  
上舉示之軍士望見則知前值水也鳶屬鳴則風  
生風生則塵埃起故前有塵埃則畫鳶為開口如鳴

時於旌首而戴之不言旌從可知也鴻雁也雁行  
列與車騎相似故前有車騎則畫鴻於旌首而戴之  
古人不騎馬經典無言騎者今言騎是周末時禮虎  
威猛兵衆之象若前有兵衆則舉虎皮於竿首勢獸  
猛而能擊謂虎狼之屬貌貅是一獸亦有威猛若前  
有猛獸則舉此貌貅皆欲使衆見以為防也或云與  
虎皮並畫作皮於旌也一云並戴其皮  
貌一名豹虎類也爾雅云貌白虎也

行前朱鳥而後玄武左青龍而右白虎招搖在上急繕

其怒

繕音  
勁

鄭氏曰以四獸為軍陳象天也招搖星在北斗杓端  
主指者急猶堅也繕讀曰勁又畫招搖星於旌旗上  
以堅勁軍之威怒孔氏曰前明軍行逢值之禮此明  
軍行象天文而作陳法也前南後北左東右西也朱



崔玄武青龍白虎四方宿名也軍前宜捷故用鳥軍  
後須殿捍故用玄武玄武龜也龜有甲能禦侮用也  
左為陽陽能發生象其龍變生也右為陰陰沈能殺  
虎沈殺也軍之左右生殺變應威猛如龍虎也此陳  
法但不知如何為之今之軍行畫此四獸於旌旗以  
標前後左右之軍陳招搖北斗第七星也七星一天  
樞二旋三機四權五衡六開陽七搖光一至四為魁  
五至七為杓招搖即搖光也北斗居四方宿之中以  
斗末從十二月建而指之則四方之宿不差今軍行  
法之亦作此北斗星舉之於上在軍中指正四方使  
四方之陳不差故云在上並作七星而獨云招搖者  
舉指者為正也勁利也其怒士卒之怒也軍行旣張  
四宿於四方標招搖於甲上故軍旅士  
卒起居舉動堅勁奮怒象天之行也

進退有度左右有局各司其局

鄭氏曰度謂伐與步數局部分也孔氏曰牧誓云不愆于六步七步乃止齊焉四伐五伐乃止齊焉一擊一刺爲一伐始前就敵六步七步當止齊正行列及兵相接少者四伐多者五伐又當止齊正行列也軍之在左在右各有部分不相濫也軍行須監領故主帥部分各有所司部分也

### 右記行軍之禮凡一節

君天下曰天子朝諸侯分職授政任功曰予一人踐阼臨祭祀內事曰孝王某外事曰嗣王某臨諸侯畛於鬼

神曰有天王某甫

朝音潮畛之忍切

鄭氏曰天子予一人皆擯者辭也天下謂外及四海也今漢於蠻夷稱天子於王侯稱皇帝覲禮曰伯父

寔來予一人嘉之孝王其嗣王其天王其甫皆祝辭也惟宗廟稱孝天地社稷祭之郊內而曰嗣王不敢同外內也畛致也鬼神謂百辟卿士也祝告致於鬼神曰有天王其甫其甫且字也不名者不親往也周禮大會同過山川則大祝用事焉孔氏曰此論天子稱謂之辭天下謂七千里外四海之諸侯天子者上天之子爲天所命以四海難服而夷狄唯知畏天擴者稱天子尊名以威臨之彼不識王化無有歸往之義故不稱王也朝諸侯謂七千里內諸侯授政謂授所縣象魏之法於諸侯也任功謂使人專掌委任之功若五侯九伯女實征之也予我也予一人者言我是人中之一人自謙損也臣下謂之一人者所以尊王也以天下之大四海之內所共尊者一人爾踐履也祚主人之階也謂即位履主階行事也臨祭祀謂臨郊廟之祭祀也內事宗廟也事親宜言孝故升祚階祭廟則云孝王其其天子名也外事郊社也天地

尊遠不敢同親云孝故云嗣王某言此王繼嗣前王而立也鄭謂不敢同外內者若宗廟內事祭辭稱孝山川嶽瀆祭之在外而辭稱嗣今天地社稷既尊祭之在內而用外辭不敢同外內之常例也至若巡守徧於方嶽臨視諸侯凡所過山川悉不親往使祝致辭故不稱名而曰某甫某是天子字稱天子字而下云甫者甫是男子美稱且假借美稱以配成其字也鄭註鬼神謂百辟卿士者蓋謂天子所行過諸侯之國則止於其廟而使太祝告其廟之鬼神即昔之爲百辟卿士者也若過山川亦使太祝往告故引太祝職以證之呂氏曰言天下者外薄四海兼夷狄也古者於中國稱天王於夷狄稱天子夷狄者聲教之所不及非王法所能治故不稱天王而稱天子言天無所不覆也天子者繼天而王者也稱於夷狄曰天子天子外辭也稱於諸侯及臣下曰予一人內辭也予一人猶言孤與寡人也不敢以勢位驕人自比一人

而已書所稱予一人大抵告諸侯之言分職授政仕功則凡所以命諸侯命諸臣者莫不然也鬼神之在諸侯竟內者天子不親祀也曰有天王其甫有司不敢名君而告神不可以無字也畛接也猶畦畛之相接然與交際之際同義劉氏曰朝諸侯謂分土為九州以封五等之國四時來朝六年而徧也分職謂設六官以法天地四時也授政謂頒禮樂之成法也任功謂任天下之才而興功立事也此三者天子所以役中國之賢才乃尊尚其德謙抑自卑而自稱曰予一人也澄曰宗廟所祭者一家之親內神也故曰內事郊社及山川之屬所祭者天下一國之神皆外神也故曰外事鄭氏以祭於郊內者為內事祭於郊外者為外事非也

崩曰天王崩復曰天子復矣告喪曰天王登假措之廟

# 立之主曰帝

假音遇措  
七故切

鄭氏曰天王崩史書策辭也天子復矣始死時呼魂辭也不呼名臣不名君也諸侯呼字告赴也登上也假已也上已者若仙去云爾立主曰帝同之天神春秋傳曰凡君卒哭而祔祔而作主孔氏曰自上墜下曰崩主者死如從天墜下故曰崩也復招魂復魄也精氣為魂身形為魄人命終畢精氣離形臣子罔極猶望更生故使人升屋北面招呼死者令還復身中故曰復也男子呼名婦人呼字令魂識知其名字而還王者不呼名字者一則臣子不可名君二則普天率土王者一人而已故上呼天子復也告喪謂天王崩遣使告天下萬國葬後卒哭竟而祔置于廟立主使人依之天神曰帝今號此主同於天神若文帝武帝之類是也崔氏曰古者帝王生死同稱生稱帝者死亦稱帝生稱王者死亦稱王今廟主曰帝蓋是為

記時有主入廟稱帝之義記者錄以為法也呂氏曰考之禮經未見有以帝名者惟易稱帝乙亦不知其何帝獨司馬遷史記載夏殷之王皆以帝名疑殷人祔廟稱帝遷據世本而言當有所考至周有諡始不名帝胡氏曰遐遠也竹書紀年帝王沒皆曰陟陟亦登也澄曰登猶言升陟假與遐同尊之不敢言其死但言其升陟于遐遠之處猶言其登天也

# 天子未除喪曰予小子生名之死亦名之

鄭氏曰謙未敢稱一人孔氏曰天子在喪未踰年稱名稱子踰年之後三年之內稱予小子三年除喪然後稱王也踰年稱王者據臣子稱也成王在殯子釗稱予一人者以麻冕黼裳即位受顧命從吉故暫稱一人也澄曰春秋景王崩悼王未踰年入于王城不稱天王而稱王猛所謂生名之也死不稱天王崩而

稱王子猛卒所謂死亦名之也

○天子建天官先六大曰大宰大宗大史大祝大士大卜典司六典天子之五官曰司徒司馬司空司士司寇典司五衆天子之六府曰司土司木司水司草司器司貨典司六職天子之六工曰土工金工石工木工獸工草工典制六材

鄭氏曰此蓋殷時制也周則大宰為天官大宗曰宗伯宗伯為春官大史以下屬焉大士以神仕者衆謂羣臣也五官於周則司士屬司馬大宰司徒宗伯司馬司寇司空為六官六府主藏六物之稅者周則皆



屬司徒六工於周皆屬司空土工陶甃也金工築冶  
鳧粟段桃也石工玉人磬人也木工輪輿弓廬匠車  
梓也獸工函鮑韞韋裘也惟草工職亡蓋謂作萑葦  
之器孔氏曰殷家六卿大宰司徒司馬司空司士司  
寇是也大宰一卿法天時司徒以下五卿法地事但  
大宰既尊故先列之并顯大宗以下所隸屬之官大  
宰既法於天故同受大名云六大也典司六典者上  
典是守典之典下典是典法之典立此六官以守主  
六事之法又置五官以象地之五行不云建從天官  
也又天官尊陽故一官以攝衆地官卑陰故五卿俱  
陳也不云地者與前五也典司五衆者言用此五官  
使各守其所掌之羣衆也此五官各有所領羣衆如  
大宰領大宗以下而不條出其人者略也天言六典  
地言五衆互言也殷既法天地立官又為萬物立府  
司土於周為土均掌均平地稅之政令司木於周為  
山虞主虞度山之大小所生之物司水於周為川衡

掌巡行川澤平其禁令如衡司草於周為稻人掌稼  
種下地及除草萊司器於周為角人掌以時徵齒角  
於山澤之農供為器用司貨於周為升人掌金玉錫  
石之地為之守禁以時取之以供器物金玉曰貨故  
稱司貨六職者使六府各主其所掌職也既有六府  
之物宜有六工以作為器物工能也言能作器物者  
也考工記陶人為甗旃人為簋即土工也築氏掌為  
削削謂書刀冶氏掌為戈戟冶謂煎金錫鳧氏世能  
為鍾以供樂器鼎氏世能為量器謂豆區鬴鍾之屬  
段氏主作錢鑄田器桃氏為刃刀劍之屬此即金工  
也玉人作圭璧磬人作磬玉與磬皆出於石此即石  
工也輪謂車輪輿謂車牀車難不能一人獨成各有  
所善故輪輿不同弓能作弓廬能作戈戟秘匠能作  
宮室之屬車能作大車及羊車梓為杯勺為筍簠之  
屬此七物並用木皆木工也函能作甲鎧鮑謂能治  
皮供作甲韞人為皐陶鼓木謂能以皮冒鼓韋熟皮

為衣及韎韐裘謂皮帶毛為狐裘之屬此諸物並用獸皮即獸工也草工則以萑葦作盛食器及葦席之屬陸氏曰按考工記土工埴埴之工也金工攻金之工也石工刮摩之工也木工攻木之工也獸工攻皮之工也草工蓋設色之工以藍為青以蒺為紫以蒨為紅以藁為黃之類是也草讀如字今讀作卑非正也五官一司徒次司馬次司空次司士次司寇以司士代宗伯者司士所掌與禮相通也呂氏曰殷人尊神先鬼大宗以下皆事鬼神奉天時之官故總謂之神先鬼大宗者佐王伐天工以治大宗掌事鬼神大史天官大宰者佐王代天工以治大宗掌事鬼神大史掌正歲年及頒朔大祝所以接神士即周司巫所以降神大卜主問龜所以求神六者皆天事也周官司士則夏官之屬此別出者司士掌羣臣之版及卿大夫庶子之數則所統者衆與司馬司徒司空司寇略等所以並為五官也司徒之衆則六卿六遂是也司馬之衆六軍是也司空之衆百工是也司寇之衆士

師司隸之屬是也故曰典司五衆六府者主藏之官  
斂藏六者之入以待國用者也農以耕事貢九穀則  
司土受之山虞以山事貢木材則司木受之澤虞以  
澤事貢水物則司水受之圃以樹事貢薪芻蔬財則  
司草受之工以飭材事貢器物則司器受之商以市  
事貢貨財則司貨受之周官司土則廩人倉人之職  
司木則山虞林衡之職司水則澤虞川衡之職司草  
則委人之職司器司貨則玉府內府之職所入者乃  
農圃虞衡工商之民所貢故曰典司六職六工者飭  
材為器以待國用所治之材各不同故曰典制六材  
吳氏華曰郊子所言少吳氏之官名曰祝鳩氏司徒  
也雉鳩氏司馬也鴈鳩氏司空也爽鳩氏司事也鵲  
鳩氏司寇也五鳩鳩民者  
也五鳩與曲禮五官同

## ○五官致貢曰享

陳氏曰王制公侯伯子男凡五等卿大夫上中下士凡五等曲禮六大以下皆謂之五官然五官致貢與五官之長所謂五官者諸侯而已蓋以其有所侯則曰侯以其有所主則曰官以物供上曰貢以儀致貢曰享周禮凡官府所供謂之獻邦國所供謂之貢則致貢曰享為諸侯之事明矣澄曰註疏諸家因上六大五官之文故釋此五官二字致誤唯陳氏之說得之蓋五官猶五侯也公侯伯子男五等之侯朝覲天子以貢其土物皆先執圭以朝乃以玉帛將其所貢之物謂之享

○五官之長曰伯是職方其擯於天子也曰天子之吏天子同姓謂之伯父異姓謂之伯舅自稱於諸侯曰天子之老於外曰公於其國曰君

長知兩切  
擯必刃切

此言五官之長謂天下五等諸侯之長也伯者方伯也分天下為二方設二伯以各長其方之諸侯也皆王之三公為之如周公召公畢公者三公八命加一命則為九命之伯也鄭氏曰五官之長謂三公九命作伯職主也二伯分主東西春秋傳曰自陝以東周公主之自陝以西召公主之曰天子之吏攬者辭也春秋傳曰王命委之三吏謂三公也孔氏曰畿外之大莫大於二伯三公加一命出為分陝二伯是也伯長也是職方者言二伯於是職主當方之事也攬謂天子接賓之人若攬者傳辭於天子則稱此二伯為天子之吏亦當言名記者略之攬呼在朝三公為天子之吏然玉藻伯曰天子之力臣者謂介傳命稱天子力臣攬者受辭傳於天子則曰天子之吏鄭引春秋三吏證呼三公為吏也三公與王同姓者王呼為伯父伯者長大之名父乃同姓重親之稱也伯舅異族重親之名也異族無父稱故呼為伯舅按晉文公

為侯伯左傳傳二十八年王曰叔父不稱伯者以州牧之禮命之也昭九年云伯父惠公又曰我在伯父猶衣服之有冠冕一時尊晉之辭也周公為二伯詩稱王曰叔父成王以本親命之也二伯若與九州及四夷之諸侯言則自謂天子之老繫於天子威遠也國外者其私土采地之外也而猶在王畿之內如周公食邑於周嚮國外之人其稱曰公也其國采地內也若采地內臣民則稱曰君既主分陝又在王朝嫌不正為采地君故明之也

九州之長入天子之國曰牧天子同姓謂之叔父異姓謂之叔舅於外曰侯於其國曰君

九州之長謂各州諸侯之長也牧者州牧也蓋五等諸侯王者之後稱公者不為牧唯侯爵在伯子男三

爵之上故每州命一侯爵者為牧以長其境內諸侯也侯七命加一命則為八命之牧州牧一云侯伯謂於一州之諸侯為長故亦可稱曰伯非方伯之伯也鄭氏曰每一州之中天子選諸侯之賢者以為之牧也周禮乃施典於邦國而建其牧尊於大國之君而謂之叔父辟二伯也二王之後不為牧孔氏曰每州之中選賢侯一人加一命使主一州為牧若入天子之國則自稱曰牧牧養也言其養一州之人也伯不言入天子之國者略之也牧勞於二伯故天子謂之叔叔小也若呼為伯則亂於二伯外謂其所封外九州內也稱曰侯侯是本爵若國內臣民言稱為君也

其在東夷北狄西戎南蠻雖大曰子於內自稱曰不穀於外自稱曰王老



鄭氏曰謂九州之外長也天子亦選其諸侯之賢者以爲之子子猶牧也入天子之國曰子天子亦謂之子雖有侯伯之地本爵亦無過子是以同名曰子不穀譙稱穀善也王老威遠國也外亦其夷狄之中孔氏曰此不知幾國立一人卑不得名爲牧又不得謂爲父舅其本爵不過子男若本爵是男亦謂爲子舉其高者言之也或有多功益土雖加侯伯之地而爵不得進終守子男以卑遠故也呂氏曰九州之外即四夷也選諸侯而統之如九牧之比謂之子所以別於中國也不睦猶言不肖不稱寡人僻中國諸侯也於外者非其國而在所統四夷之中王老猶言天子之老也嫌其遠於王化故以王明之葉氏曰能自養其類曰子劉氏曰楚子吳子皆天子命之爲蠻夷衆國之牧者

庶方小侯入天子之國曰某人於外曰子自稱曰孤

鄭氏曰謂戎狄子男君也男者於外亦曰男舉尊言之孔氏曰庶衆也小侯謂四夷之君非爲牧者也以其賤故曰衆方也若入王國自稱曰某人若年人介人也六服之內但舉伯牧不顯其餘諸侯九州之外既舉大國之子又舉其餘小國者以六服諸侯下文別更具顯故於此略之外日子者此君在其本國外四夷之中自稱依其本爵或子或男今言子是舉其尊稱若男亦稱男也自言曰孤孤者特立無德能也方氏曰庶方小侯亦九州之外也以其非長故曰庶方以其非大故曰小侯雖大不過子而小乃謂之侯者蓋五等之爵通謂之諸侯入天子之國曰某人則不以其爵稱賤而略之也於外日子則稱之以爵矣入內則屈出外則伸也小侯亦有男特舉子以該之爾於外日子而不言自稱則人稱之也自稱曰孤而不曰內外則通內外也呂氏曰自稱曰孤又下於不穀也春秋楚子稱不穀從其稱也齊桓公對楚屈完

稱不穀以自卑之辭答楚也魯弔宋突宋閔公稱孤列國有凶稱孤自貶之稱也

○諸侯見天子曰臣某侯某其與民言自稱曰寡人其在凶服曰適子孤臨祭祀內事曰孝子某侯某外事曰

曾孫某侯某

見賢通切適音的

鄭氏曰臣某侯某番夫承命告天子辭也其為州牧則曰天子之老臣某侯某自稱曰寡人謙也於臣亦然凶服亦謂未除喪祭祀稱國者遠辟天子孔氏曰謂五等諸侯見天子而擯者將命之辭某侯者若言齊侯下某是名若伯子男則云曹伯許男某也觀禮番夫為末擯承命於侯氏下介傳而上上擯以告於天子也若為州牧擯者告賓之辭雖記云相者告曰孤德之人適子孤擯者告賓之辭雖記云相者告曰孤

某須矣彼不云適子此不云名皆文不具也稱孤稱名皆謂父死未葬之前外事謂社稷山川在封內者天子外事言嗣王某謂能繼天德而立也諸侯不得稱嗣侯但稱曾孫謂是父祖重孫爾

### 死曰薨復曰某甫復矣

鄭氏曰薨亦史書策辭某甫舉字孔氏曰國史策辭謂薨異國史書之則但云卒也若告於諸侯則辭當謙曰寡君不祿方氏曰諸侯曰某甫復字之也常人曰卑某復名之也呂氏曰君天下以下言天子之異稱也此以上言諸侯之異稱也

### 既葬見天子曰類見言謚曰類

鄭氏曰類猶象也代父受國執皮帛象諸侯之禮見也言謚者序其行及謚所宜使大夫行象聘問之禮

也其禮俱亡陳氏曰諸侯既葬見天子變禮也有事於上帝而非事天之常禮曰類于上帝有事於社稷宗廟而非祭享之常禮曰類于社稷宗廟則嗣君之朝王大夫之言諡非朝聘之常禮謂之類宜矣孔氏曰類見謂諸侯世子父死葬畢見於天子也未執王而執皮帛然春秋之義三年除喪之後乃見今云既葬者謂天子巡守亦不見也言諡就君請諡也諡以表德雖天子巡守亦不見也言諡就君請諡也諡以表德必由尊者所裁故將葬之前使人請於天子若櫬弓云其子戌請諡於君曰日月有時將葬矣請所以易其名者也類者言此類聘問之禮而行也呂氏曰先儒謂類猶象也其義未安求之未得闕疑可也王氏曰請諡必以其實為諡類於平生之行也何氏曰類其德而稱之如經天緯地曰文也劉氏曰言諡曰類當為誅聲誤爾謂誅而諡之也

○諸侯使人使於諸侯使者自稱曰寡君之老

使於使者色吏

切

鄭氏曰繫於君以為尊也此謂諸侯之卿上大人孔氏曰玉藻云上大夫曰下臣擯者曰寡君之老下大夫自名擯者傳辭及自稱於他國亦曰寡君之老則上大夫擯者傳辭及自稱於他國亦曰寡君之老若於已君則玉藻云下臣某呂氏曰三公自稱於諸侯曰天子之老諸侯之卿自稱於諸侯曰寡君之老士大夫家宰亦曰老老長稱也自稱天子之老寡君之老比於家臣之長亦謙辭也

列國之大夫入天子之國曰某士自稱曰陪臣某於外曰子於其國曰寡君之老使者自稱曰某

鄭氏曰列國大夫亦謂諸侯之卿也三命以下於天子為士曰某士者若晉韓起聘於周擯者曰晉士起是也陪重也子有德之稱魯春秋曰齊高子來盟使者謂使人於諸侯也某名也孔氏曰列國五等諸侯也天子上士三命中士再命下士一命而五等之臣唯公國一孤四命爾自卿大夫從三命而下其命等於王之士故入天子之國則擯者稱為某國之士也陪臣者其君已為王臣已今又為已君之臣故自稱對王曰重臣也外謂在他國時也擯者則稱其姓而曰子其國自國中也其君與民言自稱曰寡人故此卿與國中人語自稱曰寡君之老也若此卿為使在他國與彼君語則稱名按玉藻上下大夫於他國擯皆無稱名之事但云大夫私事使私人擯則稱名私事使若晉韓穿來言汶陽之田謂以君命私行非聘也彼以私事使故稱名故知此言使謂使人於諸侯也

○天子當依而立諸侯北面而見天子曰覲天子當宁

而立諸公東面諸侯西面曰朝

依於豈切  
宁珍呂切

鄭氏曰諸侯春見曰朝受摯於朝受享於廟生氣文也秋見曰覲一受之於廟殺氣質也朝者位於內朝而序進覲者位於廟門外而序入王南面立於依宁而受焉夏宗依春冬遇依秋覲禮今存朝宗遇禮今亡孔氏曰天子當依而立者秋於廟受覲也依狀如屏風以絳為質高八尺東西當戶牖之間繡為斧文示威也諸侯來至於近郊王使大行人皮弁用璧以迎勞之諸侯以皮弁從使者以入天子賜舍諸侯受舍聽天子之命其朝日未出之前諸侯上介受舍於廟門外同姓西面北上異姓東面北上至朝日質明諸侯裨冕先釋幣於其齊車之行主天子衮冕在廟當依前南面而立諸侯在廟門外位其尊卑各在其



次中未得相見天子不出迎賓使上擯進諸侯諸侯  
入廟門右坐奠圭玉而再拜所以奠圭玉者卑見於  
尊奠贄不授也擯者命升西階親授諸侯於是坐取  
圭玉升堂王受玉諸侯降階並北面再拜稽首擯者  
延之使升成拜覲畢而享皆廟受之陰殺之時其氣  
質斂不布散故并於一處受之也天子當宁而立者  
春於路門外之朝受朝也宁謂門屏之間李巡云正  
門內兩塾間曰宁正門謂之應門諸侯內屏在路門  
之內天子外屏在路門之外而近應門諸侯各乘其  
命車至臯門外陳介天子車在大門內傳辭既訖則  
乘車出大門下車若升朝之時王但迎公自諸侯以  
下則隨之而入更不別迎入至廟門天子還服朝服  
立於路門之外諸侯更易朝服執贄入應門而行禮  
王當宁以待諸侯次第而進諸公在西諸侯在東而  
朝王地道貴右故公在西受朝竟然後入廟受享陽  
生之時其氣文舒而布散故分於兩處受也當依當

寧王皆南面朝猶朝也欲其來之早宗尊也欲其尊王也覲之言勤也欲其勤王之事過猶偶也欲其若不期而俱至通言之  
悉曰朝從初受命

諸侯未及期相見曰過相見於郤地曰會諸侯使大夫

問於諸侯曰聘約信曰誓涖牲曰盟

郤邱逆切  
涖音利

鄭氏曰及至也郤間也涖臨也坎用牲臨而讀其盟書聘禮今存過會誓盟禮亡誓之辭尚書有六篇孔氏曰若未至前所期之日及非所期之地而忽相見則並用過禮相接故曰過以過禮簡易也會謂及期之禮既及期又至所期之地則其禮閒暇也遣大夫往相存問曰聘聘問也約信者以其不能自和好故用言辭共相約束以為信如此相見則用誓禮盟者殺牲歃血誓於神也若約束而臨牲則用盟禮盟之

為法先鑿地為方坎殺牲於坎上割牲左耳盛以珠盤又取血盛以玉敦用血為盟書成乃歃血讀書盟牲所用據韓詩天子諸侯以牛豕大夫以犬庶人以雞毛詩說君以豕臣以犬民以雞左傳衛伯姬盟孔悝以玃而又云諸侯盟誰執牛耳戎右云贊牛耳則人君盟當以牛也

○納女於天子曰備百姓於國君曰備酒漿於大夫曰

備埽灑

埽悉報切灑所買切

鄭氏曰納女猶致女也女家遣人致之此其辭也姓之言生也天子皇后以下百二十人廣子姓也酒漿埽灑婦人之職孔氏曰壻不親迎則女之家三月廟見使人致之言致此女備王之后以下生廣子孫故云百姓也致女於諸侯為辭轉卑詩云惟酒食是議是也埽灑不敢同諸侯彌賤也唯及大夫不及士士

卑故也。呂氏曰：不敢以伉儷自期，願備媵妾之數，自卑之義也。古者因生以賜姓，如姬姜、嬴姁、姑之類，似因其母之號而賜之姓，納女於天子以廣繼嗣，凡賜姓者皆天子之別子，所以謂之備百姓。陸氏曰：百姓，百斯男也。方氏曰：酒漿者奉祭祀之物，埽灑者有冢之事，皆主人之誼，辭故每言備焉。備者，備其乏也。

○天子之妃曰后，諸侯曰夫人，大夫曰孺，人士曰婦人。

## 庶人曰妻

孔氏曰：妃配也。王后以下通有配義，故以妃字冠之。特牲少牢是大夫士禮，皆云某妃配某氏，尊卑通稱也。后君也，配至尊為海內小君也。夫人之名，惟諸侯得稱，論語云：邦君之妻稱曰君夫人，是也。孺，屬也。言其為親屬婦服也。言服事其夫婦，亦上下通號。春秋逆婦，姜諸侯亦呼婦也。妻，齊也。庶人賤，無別稱，判合。

齊體而已通言之  
貴賤悉曰妻也

○天子有后有夫人有世婦有嬪有妻有妾公侯有夫

人有世婦有妻有妾

嬪音貧

鬻義曰古者天子后立六宮三夫人九嬪二十七世婦八十一御妻以聽天下之內治澄曰此以世婦先於嬪者蓋后之下夫人最尊嬪次尊夫人之數三嬪之數九小數自三而九共為十二三夫人隔越一位有世婦二十七其數合三十九嬪隔越一位有御妻八十一其數合九十大數亦自三而九共為百二十取其數之合故移其位以相近又夫人世婦皆以兩字為稱嬪妻妾皆以一字為稱取其文之便故因其類以相從也呂氏曰后以配天子夫人視三公其名與諸侯之妃同世婦視大夫其名與大夫之妻同凡

嬪視九卿位在世婦上妻即御妻視元士名與士之妻同妾則昏義所無蓋賤者視庶人鄭氏曰妻八十者公侯無后與嬪去上中貶於天子也孔氏曰公侯既下於天子不得立后故以敵體者為夫人世婦謂夫人之姪娣其數二人貴於二媵妻謂二媵及姪娣也凡六人妾謂九女之外別有妾上文天子八十一御妻之外有妾不入百二十人數此妾亦不在九女之數也陳氏曰大夫娶一家而二家媵之諸侯娶一國而二國媵之天子娶一國而三國媵之由后至御妻百二十人則天子一聘十二女可知也天子之后至妾凡六等諸侯之夫人至妾凡四等降殺以兩也

○夫人自稱於天子曰老婦自稱於諸侯曰寡小君自稱於其君曰小童自世婦以下自稱曰婢子子於父母

則自名也

鄭氏曰自稱於天子謂畿內諸侯之夫人助祭若時  
事見也自稱於諸侯謂饗來朝諸侯之時也小童若  
云未成人也婢之言卑也於其君稱此以接見體敵  
嫌其當也子名父母所謂也言子通男女孔氏曰畿  
內諸侯之夫人助祭於后得接見天子故得自稱老  
婦畿外諸侯之夫人無見天子之禮時事見謂若獻  
蒲之屬自稱於諸侯謂他國君也古者諸侯相饗夫  
人亦出故得自稱坊記云大饗廢夫人之禮知前有  
其禮也君之妻曰小君而云寡者從君為諫也其與  
夫言自稱為小童言無知也世婦以下降於夫人故  
並自稱婢子嫌若當夫人也呂氏曰婦事舅姑者也  
諸侯事天子猶子事父則夫人必稱婦也寡小君者  
臣下稱諸異邦之辭猶稱其君為寡君也小童之稱  
雖論語亦云然不見於他經傳也秦夫人告秦伯曰

晉君朝以入則婢子夕以死雖夫人亦稱婢子自貶而就下也子之名父母所命不敢有他稱也

○君大夫之子不敢自稱曰余小子大夫士之子不敢自稱曰嗣子某不敢與世子同名

王氏曰君大夫之子國君及大夫之子也澄曰國君及天子之大夫其子自稱當辟諸侯之子國君及天子大夫之子不敢與王世子同名諸侯大夫士之子不敢與國君世子同名鄭氏曰君大夫天子大夫有土地者不敢稱余小子辟天子之子未除喪之名大夫士之子不敢稱嗣子某亦辟其君之子未除喪之名也不與世子同名辟僭效也其先之生則亦不改孔氏曰大夫有地者稱曰君故云君大夫天子未除喪稱余小子今大夫有地雖同曰君而其子在喪不敢同天



子稱也大夫子之子諸侯之大夫士之子也諸侯在  
密稱嗣子某臣之子宜辟之世子謂諸侯之適子諸  
侯之臣為其子作名不得與君適子名同同則嫌其  
名自比儼於君也世子貴不得同則與庶子同不嫌  
又若其子生在君之世子前已為名而君來同已不  
須易也故穀梁昭七年傳云何為君臣同名君子不  
奪人親之所名重其所由來也  
雜記云與君之諱同則稱字

○國君不名卿老世婦大夫不名世臣姪娣士不名家

相長妾

婦大計切相去聲長知兩切

鄭氏曰雖貴於其國家猶有所尊也卿老上卿也世  
臣父時老臣孔氏曰世婦謂兩媵也次於夫人而貴  
於諸妾諸侯雖貴猶宜有所敬不得呼卿老世婦之  
名姪妻之兄女娣妻之妹從妻來為妾也大夫不得

呼世臣貴妾名也家相助知家事者長妾妾之有子者士不得呼此二等人名也熊氏曰士有一妻二妾言長妾者當為娣也呂氏曰卿老世臣家相貴臣也世婦姪娣長妾貴妾也均臣妾也特異其貴者

○天子不言出諸侯不生名君子不親惡諸侯失地名

### 滅同姓名

鄭氏曰天子之言出諸侯之生名皆有大惡君子所遠出名以絕之春秋書天王出居于鄭衛侯朔入於衛是也失地滅同姓名亦絕之孔氏曰天子以天下為家不得言出諸侯南面之尊不可稱名君子謂策書君子若孔子書經見天子大惡書出以絕之諸侯大惡書名以絕之君子不親此惡人故書以罪之也失地名若春秋莊十年荆敗蔡師于莘以蔡侯獻舞歸是也滅同姓名若僖二十五年衛侯燬滅邢是也

澄曰此一節蓋前儒說春秋之辭而記禮者錄之然  
春秋書天王居凡三居于皇居于狄泉不書出者未  
離天子之國也居于鄭書出者已去天子之國矣謂  
天子不言出非也諸侯失地皆當名雖去國而未失  
其國則不名也亦有小國之君其名無可考而不名  
者衛侯燬滅邢蓋因下文有衛侯燬卒而傳馮者誤  
衍一燬字非以其滅同姓而特名之謂諸侯滅同姓  
名非也君子不親惡一句若依註疏說福迫刻薄有  
害於教呂氏謂君子之人不親為惡凡天子書出諸  
侯生而書名者皆親為惡之人不可以為君子欲救  
註疏之失而  
亦牽強不安

○天子死曰崩諸侯曰薨大夫曰卒士曰不祿庶人曰

死在床曰尸在棺曰柩

柩音舊

鄭氏曰自上傾壞曰崩薨傾壞之聲卒終也不祿不終其祿死之言漸也精神漸盡也尸陳也柩之言究也孔氏曰生時尊卑著見可識死蔭為野土嫌若可輕襲故為制尊卑之名明其猶有貴賤之異也崩者譬若天形墜壓四海必觀王者登假率土咸知也薨者崩之餘聲聲遠劣於形壓諸侯之死知者亦狹也卒畢竟也大夫是有德之位仕能至此亦是了畢平生也士祿以代耕而今遂死是不終其祿也漸是消盡無餘之日庶人生無令譽死絕餘芳精氣一去身名俱盡也人初生在地病困氣未絕之時下置於地冀脫死重生氣絕之後更還床上既未殯斂陳列在床故曰尸白虎通云失氣亡神形體獨陳也三日不生斂之在棺死事竟畢於此故曰柩

壽考曰卒短折曰不祿死寇曰兵羽鳥曰降四足曰漬

折市設切降戶江切  
又音絳漬疾賜切

方氏曰壽言數之延考言德之成蚤死謂之短中絕  
謂之折呂氏曰大夫曰卒士曰不祿論其爵也壽考  
曰卒短折曰不祿論其德也兵者死於寇難之稱有  
兵死而可褒者如童汪錡能執干戈以衛社稷孔子  
欲勿殤勇於死難者也有兵死而可貶者如家人凡  
死於兵者不入兆域戰陣無勇者也鄭氏曰降落也  
漬謂相濺汗而死異於人也孔氏曰羽鳥飛翔之物  
降落是死也四足牛馬之屬一死則餘者更相染漬  
而死也

○祭王父曰皇祖考王母曰皇祖妣父曰皇考母曰皇

妣夫曰皇辟

辟音壁

孔氏曰王父祖父也王母祖母也鄭氏曰皇君也考成也言其德行之成也妣之言嬪嬪於考也辟法也妻所取法也更設稱號尊神異於人也

生曰父曰母曰妻死曰考曰妣曰嬪

孔氏曰父母妻生死所稱不言祖及夫者以生號無別稱也考妣嬪謂非祭時所稱前是宗廟之祭加其尊稱故父母並曰皇也此生死異稱出爾雅然通而言之尚書云大傷厥考心又曰聰聽祖考之彝訓詩大明云曰嬪于京周禮九嬪並非生死異稱矣鄭氏曰嬪婦人有法度者之稱張子曰嬪是婦人之美稱夫死曰辟於古不見有此稱

○凡祭宗廟之禮牛曰一元大武羊曰柔毛豕曰剛鬣

豚曰腊肥犬曰羹獻雞曰翰音雉曰䟽趾兔曰明視橐  
魚曰商祭鮮魚曰脰祭脯曰尹祭水曰清滌酒曰清酌  
稷曰明粢黍曰薌合粱曰薌其稻曰嘉蔬韭曰豐本鹽

曰鹹鰾玉曰嘉玉幣曰量幣

鬣力輒切膾徒忽切䟽色  
魚切橐苦老切鮮音仙脰

宅頂切薌音香其音姬一  
音期鰾才何切量音亮

鄭氏曰號牲物者異於人用也元頭也武迹也膾亦  
肥也商猶量也脰直也尹正也嘉善也稻菰蔬之屬  
也豐茂也大鹹曰鰾幣帛也孔氏曰凡祭謂貴賤悉  
然牛肥則脚迹痕大羊肥則毛細而柔弱豕肥則毛  
鬣剛大犬肥可獻祭鬼神也雞肥則其鳴聲長雉肥  
則兩足開張趾相去䟽也兔肥則目開而視明也自


牛至兔八物唯牛云一頭以下不云數者皆從其所用而言也。稊乾也。商祭者祭用乾魚量度燥濕得中而用之。胙祭者鮮魚煮熟則胙直若餒則敗碎不直也。尹祭者裁截方正而用之。清滌者古祭用水謂之玄酒言其甚清皎潔也。清酌者酌斟酌也。此酒甚清可斟酌也。薌合者穀秣者曰黍秣既軟而相合氣息又香也。梁謂白梁黃梁陸氏曰首孰非元牛曰一元迹孰非武牛曰大武雞鳴振羽是謂翰音兔視月而生曰明視。粱言實合言氣。其言幹蔬言苗。項氏曰牛羊豕豚雞雉兔皆以其形聲之美者為號。獨犬曰羹獻者其形聲不足言羹之而獻其味爾。稊魚曰商祭稊者不盡佳必擇而用之也。鮮魚曰胙祭。濡魚進尾右鰭左腴直陳之也。脯曰尹祭。左胸右末橫陳之也。明粱以其飯之盛於器者言薌合以其實之升於量者言薌其以其稭之立於場者言嘉蔬以其苗之植於地者言呂氏曰禽獸之獻以肥腴為美魚腊鮮稊



以得宜為美水與酒以潔清為美黍稷稻粱以馨香  
明潔為美韭以苗之盛為美鹽以味之厚為美玉以  
不瑕為美幣以可制為美察羊與豕視其毛與鬣豚  
未成豕難察其鬣故直謂之脂肥犬下牲也可以為  
羹而獻則犬之肥也凡煮肉謂之羹八者皆以肥腍  
為美也魚腊腍脩雖微而必祭庶羞雖美而不祭故  
素魚鮮魚與脯三者皆謂之祭舉其盛也脯謂之尹  
亦謂之脩脩有所正也酒醴皆有清有醕醕未涉者  
也既涉為清酒之精者也黍稷食之正也稻粱雖美  
如食而已稷五穀之長也祭祀之飯謂之粢盛明者  
精鑿之稱也故曰明粢黍可以為酒孰之則粘聚而  
不散可搏而食之故曰薌合地美則本豐本豐則萌  
必盛故韭曰豐本劉氏曰羹獻者犬膊則清膏可充  
鉶以為獻薌其者白粱黃粱非獨米之香烈可薦神  
至於其梗亦有芳薌也嘉蔬者畦畛而種待水以生  
者皆曰蔬而稻唯其善也量幣者制量幣帛以將其

誠也澄曰稷黍粱稻皆可為粱而稷獨  
專明粱之號者以其為五穀之長也

# 右記稱謂之禮凡十七節



禮記纂言卷一下